

Wël Jethu cï Marko gôt Wët nhom

Wël path kəc col amit puøth, kek ye kəc cï gam piöc rin Jethu cï Marko gôt, aaye jæk wët cï yen ye lueel ëlä, “Wët Puøth Yam rin Jethu raan cï ləc ku dəc, Wën Nhialic.” Jethu aci nyuøth lön ye yen raan ë luui ku ala riël. Riëlde aye tñ piöcde yic, ku riëlden yen jakrəc cuøp wei kəc gup, ku lön yen adumuööm cï looi päl piny. Jethu ë ye jam riænke lön yen ke Manh Nhialic cï bën, ku bï rot gam bï nök, bï kəc poth la pan mac.

Marko aci wël Jethu gôt dhël la cök, cïn yic lueth. Ku aci käk cï Jethu looi teet yiic apath, ku aacie wël cï lueel ku käk cï piöc kek cï gôt kepəc. Yeen aya, aci wël kök cït maany kañ gôt rin Joon raan kəc muøc nhüim, ku lön cï Jethu them ë jøñrac. Ku gët käk cï Jethu looi, cimën piöc ku kë ye yen kəc tuany kony bïk pial. Tëwën cï Jethu kəc piöc, ke kəc cï wëtde gam, aake cï käk ke ye looi ya deet yiic, ku kəc ke man Jethu aaci puøth bën riääk apëi. Wël abëk cï Marko gôt athör yic ciëen, aa kãñ karou cï röt looi tënë Jethu wäär pinynhom nin kadhorou thuønde nhom tueñ, kë cï kəc man ye ye dãm ku piëët tim cï rïiu kðu bï thou, ku kë cï yen bën pïr ku jøt rot rañ yic.

Ala kãñ karou, wël Jethu cï Marko gôt thïk kecök, aye tak kəc juëc ciët ye raan dët yen met ke thïn.

Käk tã thïn
Jæk cök Wël Puøth Yam 1:1-13
Piöc ë Jethu Galilia 1:14–9:50

Jäl Jethu Galilia bi la Jeruthalem 10:1-52
 Nïn ciëen kadhrou thuunde nhom tuenj 11:1-
 15:47
 Jethu aci rot jət thou yic 16:1-8
 Jethu aci rot nyuəəth ku jət nhial 16:9-20

*Piöoc Joon raan kəc muəəc nhïim
 (Mt 3:1-12; Lk 3:1-18; Jn 1:19-28)*

¹ Wět kënë ë Wět Puəth Yam rin Jethu raan ci ləc
 ku dəc Wën Nhialic.

²⁻⁴ Wäär kəc Jethu piöocde guə jəək Joon raan kəc
 muəəc nhïim ěci piöocde jəək roor tē cïi ceŋ. Ku
 wēet kəc ělä, “Pälkē luəi käreec, ku calkē röt aa muəc
 nhïim rin bi adumuəəmkun päl piny tēnē we.”

Ku tuenj ěci Ithaya raan kək Nhialic tïŋ gət ku
 lueel ělä,

“Tē ler yïn, ɣen abi raan tək kam kəc kəkkiē luēel cəl
 alək kəc, bik yïin tiit.”

Ku ben Nhialic lueel aköl dət ělä,
 “Raan kəkkiē tïŋ abi kē cït
 löör gut yic bi yen kəc caal tēde ë rot, ku lək keek
 ělä,

‘Guierkē dhël ë Bēny, luəikē dhəlke bik la cök.’ ”

Tēen, go Joon kəc aa piöoc tēde ë rot.

Nawën gamkē wētde ke muəəc nhïim, ku ye lək
 ke ělä,

“Pälkē luəi adumuəəm ku calkē röt aa muəc nhïim,
 yen abi Nhialic adumuəəmkun päl piny.”

⁵ Kəc juēc pan Judia ku gen Jeruthalem aaci wet
 tēnē ye, ku lekkē adumuəəmken, ku jəl Joon ke
 muəəc nhïim wär Jordan.

⁶ Joon ë ye ceŋ alëth cï looi nhiëm thöröl, ku ceŋ gōp yen aŋum, ku müith ke ye cam aa koryom ku kiëc.

⁷ Ku ë ye lëk kōc, “Raan bi bën ë nin thiōkkä adit ku aril tēnē ya apēi. Yen acii thōŋ kek ye, nadē ke ya cōk guŋ ba warke dōk.

⁸ Wek aaya muōc nhiim piu, ku yeen abi we muōc nhiim Wēi Nhialic.”

*Jethu aci muōc nom ku aci jōŋrac them
(Mt 3:13-4:11; Lk 3:21-22; 4:1-13)*

⁹ Ye ninkä yiic ke Jethu bö gen Nadharet tō pan Galilia tēnē Joon, ku muōc Joon nom wār Jordan.

¹⁰ Tēwën bi Jethu bei wiir, ke tiŋ nhial ke liep rot ku tiŋ Wēi Nhialic ke bö yenhom ke cit kuur ë dit.

¹¹ Ku piŋ röl Nhialic nhial ke lueel, “Yin ë man-hdiën nhiaar, yen amit puōu ke yi.”

¹² Kaam awën ke Wēi Nhialic la yeguōp ku yēth roor tē cii ceŋ.

¹³ Ku jol Jethu rēer roor tē cii ceŋ nin thiārŋuan kek lääi, ku ë ye jōŋrac them. Ku atuuc nhial aaci bën ku konykē.

*Jethu acä amēi kaŋuan cōl
(Mt 4:12-22; Lk 4:14-15; 5:1-11)*

¹⁴ Wën cï Joon dōm, ke Jethu dhuk pan Galilia ku le kōc piōc Wēt Puōth Yam.

¹⁵ Ke ye lueel, “Aköl la cōk aci bën, bääny Nhialic athiōk! Pälkē luoi käreç ku gamkē Wēt Puōth Yam.”

¹⁶ Tēwën kueny Jethu wār Galilia yōu, ke tiŋ amēi karou, Thaimon kek Andria wämēnh ke dōm rec buoi.

17 Go Jethu lëk ke, “Biathkë ya ku wek aba piöc bäk kəc aa döm.”

18 Gokë biaiken nyään piny nyin yic ku buəthkë Jethu.

19 Wën le Jethu tuen tēthin-nyəot, ke tīŋ Jemith wën Dhubedī ku Joon wämēnh ke tō riāi yic ke guir biaiken.

20 Go Jethu ke cəol bīk jāl ke ye. Gokë wunden Dhubedī nyään piny riāi yic kek kəc cīk riəp, ku buəthkë Jethu.

Jethu ala riel yen jəŋrac cuəp wei
(Lk 4:31-37)

21 Gokë la Kapernaum. Nawën aköl cīi kəc Itharel ye luui, ke Jethu la tē ye kəc Itharel kenhīim mat thīn ku piöc.

22 Go kəc gāi ē piöcde, rin aaci piöc apath ke la riel Nhialic, cīi thōŋ kek kəcken piöc ē lööŋ.

23 Kaam thiin awën, ke raan tō kam kəc tēn amat kəc Itharel, ke la guəp jəŋrac, jam ke cī yeröl jət apeī ëlä,

24 “Yenö wīc tēnē yo Jethu raan gen Nadharet? Ca bēn ba yo bēn rac? Yīn anjiec, yīn ē raan puəth la cök bö tēnē Nhialic.”

25 Go Jethu jəŋrac duəm thok piny, “Biet, ku bäär bei yeguəp!”

26 Go jəŋrac mony awën lath ku wit piny, ku bīi bei yeguəp ke dhiau.

27 Go kəc gāi apeī ku thiëckë röt, “Yenö kēnē? Ye piöc yam kek riel Nhialic. Mony kēnē ala riel ye yen jak yök ku gamkë wətde aya!”

28 Këya, ləc ku piathde aaci guə thiēi piny pan Galilia ëbën.

*Jethu aci kəc tuany kony**(Mt 8:14-17; Lk 4:32-41)*

²⁹ Kaam awən jiël kek tən amat kəc Itharel, ke Jethu ku Jemith ku Joon la pan yï Thaimon kek Andria.

³⁰ Nawən yeetkë baai ke yök man tin Thaimon piiny ke cï təc, ke cï juäi göök. Gokë lək Jethu.

³¹ Go Jethu la tənë ye ku dəm cin ku dəc ku kony bi rot jət. Go juäi guə päl piny, ku biï mieth tənë ke.

³² Wən cï akəl lööny piny, ke kəc guëer tənë Jethu kek kəc tuany, ku kəc la gup jakrɛc.

³³ Ku jəl kəc juëc geeu kenhïim kut yöt thok.

³⁴ Go Jethu kəc juëc awən la gup tueny juëc cï bëï tənë ye kony bik pial. Ku cop jakrɛc juëc wei kəc gup. Ku cïï jakrɛc päl bik jam rin njic kek ye.

*Jethu ë kəc Galilia lək wët Nhialic**(Lk 4:42-44)*

³⁵ Nayən nhiäk riël, akëc piny bak, ke Jethu jət rot ku jiël baai. Ku le tède ë rot bi la röök.

³⁶ Go Thaimon kek kəc kək Jethu buəəth bik la wïc.

³⁷ Nawən lek yök, ke luelkë, “Raan ëbën awïc yï.”

³⁸ Go Jethu bëër, “Lokku bëï kək tō tuen yïic, ku ba la piöoc thïn aya, yen ee kën biï yen.”

³⁹ Ku jəl Jethu pan Galilia kuany yic ke pişöc yənken amat yïic, ku cop jakrɛc wei.

*Jethu acä atuet cəl apuəl**(Mt 8:1-4; Lk 5:12-16)*

⁴⁰ Tëwən kueny Jethu bëï yïic ke pişöc, ke raan cï tuet bö tənë ye, ku gut yenhiäl piny ku lən, “Anjic alëu ba ya kony bëny, ba pial. Kony ya.”

41 Go Jethu ɲääŋ nyinde tiŋ ku wïc bī kony. Ku jət yecin ku gɔət ku lueel, “Awiëc, piaalē!”

42 Kaam thiin awën, ke tuet jiël.

43 Ku jəl Jethu cəl alɔc jəl ku thən apɛi ëlä,

44 “Duk kënë la lëk raan dët. Lɔɔr ku nyuöth rot raan kāk Nhialic bī caath, ku juar kǎŋ cīt tē ye löŋ Mothith ye luεel thīn, bī kɔc ëbën ɲic lɔn cī yīn pial.”

45 Go jəl ku ɲot la kē cī rot looi lëk raan ëbën. Ku thiëi wët piny abī Jethu cīi bɛn la geeu ke ɲic. Ku ye rëer tēde ë rot tē cīn yic kɔc ë rëer thīn. Go kɔc juëc ɲot ke ye bën tënë ye baai yic ëbën.

2

Jethu acī raan cī ruai kony

(Mt 9:1-8; Lk 5:17-26)

1 Nīn juëc cök, ke Jethu ben dhuk Kapernaum. Go guɔ piŋ lɔn cī yen dhuk baai.

2 Go kɔc juëc wɛt tënë ye abī ciën tē lääu, ye cök cak la piny ɣööt agut ɣöt thok aɣeer. Ku Jethu ë piöoc kɔc Wël Puəth Yam ë Nhialic.

3 Tëwën ke raan aduany ke ket kɔc kaŋuan bīi tënë Jethu.

4 Nawën cīn tē ɣëth kek ye tënë Jethu, rin cī ɣöt thok thiäŋ kɔc, gokë la ku ɲanykë ɣöt nhom löŋ awën rëer Jethu thīn. Ku luεεckë raan aduany piny yenhom.

5 Tëwën tiŋ Jethu gamdīt tō ke ke, ke lueel tënë mony aduany, “Manhdië, adumuöömku aaci päl piny.”

6 Go kɔc piöoc lööŋ kɔc Itharel ke tō thīn, jəl tak ku luelkë kepuəth,

7 “Yeņö ye mony kënë jam kälä. Adhäl Nhialic! Yeņa adumuööm päl piny? Ciët ë Nhialic ë rot.”

8 Go Jethu kāk yekē tak guo ηic ku lueel, “Yeņö ye wek ye tak lön lueel γen lueth?”

9 Ye kēnen ril yic ë kākä yiic ba lueel tēnē raan aduany, ‘Adumuöömku aaci päl piny,’ Tēdē ke lueel, ‘Jot rot ku löm biöñdu ku cathē?’

10 Aba nyuöth we emēn lön Manh Raan ala riel pinynhom ba adumuööm päl piny.” Ku lueel tēnē mony aduany,

11 “Alēk yī, jot rot ku kuany biöñdu ku lōor baai.”

12 Go rot jot ku kueny biöñde ke δεει kek ebēn. Kënë aci raan ebēn göi. Ku leckē Nhialic ku luelkē, “Yok aakēc kēcīt kënë kaņ tīņ.”

Jethu aci Lebī cəł
(Mt 9:9-13; Lk 5:27-32)

13 Nawēn ke Jethu ben dhuk wär Galilia γou. Go kəc juēc apei bēn tēnē ye. Goke piöśc.

14 Wēn ben yen la tueņ ke dhuk geeu, ke tīņ raan ajuēr kut cəl Lebī Alpawuth ke rēēr tēden luoi. Go Jethu lēk ye, “Buöth γa.” Go rot jot ku buöth.

15 Tēwēn mīth Jethu pan Lebī, kek kəc juēc ajuēr kut, ku kəc kək la gup anyon, ke kacken ye buöth ku kəc juēc kək ye buöth aya, aake mīth kek ye ë tők.*

16 Wēn tīņ kəc piöśc lööņ, kəc akut Parathī ye, ke mīth kek kəc la gup adumuööm ku kəc ajuēr kut, gokē kacken ye buöth thiēc, “Yeņö ye bānydun mīth kek kəc ajuēr kut ku kəc kək la gup adumuööm?”

* 2:15 Lebī acəl Matheo aya.

17 Wën piŋ Jethu wët kënë, go lëk ke, “Acie kəc puəl kek aküim wïc, aa kəc tuany. Үen akęc bën ba kəc path bën cəol, aa kəc la gup adumuööm.”

Wët löŋ thëk ë miëth
(Mt 9:14-17; Lk 5:33-39)

18 Ye nïnkä, kəc Joon raan kəc muəoc nhüim buəoth ku jəl aa Parathï, aake la nïn ye kek thek bïk cïi mïth. Go kəc kək bën tënë Jethu ku thiëckë, “Үok kəc abiöth Parathï ku abiöth Joon yok aa thek, ku yïin ku kacku wek aacie thek, yenö?”

19 Go Jethu bëer ku lueel, “Yakë wïc bï kəc cï bën ruäai yic rëer ke cïi mïth? Acie tède! Na rëer raan thiëk ke ke, ka cïk loi këya.

20 Aköl bï athiëek dəm ku nyεei keyiic, yen aköl bï kek thek.

21 “Acïn raan alanh thiin ë yam buööp alanh theer köu, rin alanh thiin yam abï rot rət ku abï aban alanh theer rët bei.

22 Ku acïn raan muön abiëc ë yam puök töny theer yic, rin muön abiëc abï töny pušt yic, ku riääk muön abiëc kek töny kedhie. Ku acïi bï ya këya, muön abiëc ë yam adhïl puök töny yam yic.”

Jethu acï kuec löŋ aköl löŋ kəc Itharel
(Mt 12:18; Lk 6:1-5)

23 Naγon aköl cïi kəc Itharel ye luui, ke Jethu kek kəccken ye buəoth aake cath ke kuany dhël yic kam ë dum. Go kəc Jethu buəoth rap lek cam dhoŋ.

24 Go Parathï ke cath ke ke Jethu thiëec, “Yenö ye kacku luui aköl cï löŋdan Itharel pëen bï kəc cïi ye luui thïn?”

²⁵ Go Jethu bëër, “Këckë kë cï Debit looi wäthæer kaŋ kueen? Wäär nëk cək ye kek kacken ke cath ke ye, ku wickë miëth camkë,

²⁶ go la luan Nhialic ku ciem ayum ë yath cï tööu tënë Nhialic, kënë aloi rot wäär ye Abiathär raandit kək Nhialic. Ayum kënë ee raan kək Nhialic ë rot yen ë ye cam. Ku yeen aci Debit bën cam, ku gem abak tënë kacken awën cath kek ye. Këya, acin këræc cï kackië looi aya.”

²⁷ Ku jəl Jethu lək ke, “Aköl löŋ aci looi ke ye aköl löŋ path tënë raan. Akëc looi bi kəc röt aa ban thïn.

²⁸ Këya, Manh Raan ë bëny këriëc ëbën agut aköl ë löŋ.”

3

Jethu aci mony ci cin ruai kony

(Mt 12:9-14; Lk 6:6-11)

¹ Naŋon aköl dët, aköl cïi kəc Itharel ye luui, ke Jethu la tën amat kəc Itharel, ku mony cï cin ruai ë tö thïn.

² Ku kəc kək aake tö thïn, ku ë wickë bik tïŋ lön bi Jethu mony kënë kony bik la luom, rin cï yen ye kony aköl cïi kəc ye luui.

³ Wën ñic Jethu kë tö kepuöth, ke lək mony awën cï cin ruai, “Jot rot ku bäär tueŋ tën kəc nhïim.”

⁴ Ku lək Jethu Parathi ëlä, “Wek kəc ñoot nhïim lööŋ thæer yic, ye kënen yic lëu bi looi aköl cïi kəc ye luui, ye këpath aye këræc, bi raan kony bi pïr, kua pël wei bi thou?”

Gokë biët ëbën.

⁵ Go Jethu ke döt ke cï puşu riääk apɛi, rin ɲic kek yic ku cïk luel. Ku lëk mony awën cï cin ruai, “Nyoth yicin.” Go yecin nyooth. Go ciεεnde piath.

⁶ Go Parathï, kɔc wïc ye bï Jethu nɔk jäl tën amat ku lek tënë kɔc ʏërot. Ku lek mat ke ke tē bï kek Jethu näk thïn.

Jethu ee jakrɛc cuɔp wei kɔc gup

⁷ Go Jethu jäl kek kɔcken ye buɔɔth ku lek wär Galilia kɔu. Go kɔc juëc pan Galilia ke buɔɔth.

⁸ Wën piɲ kek käjuëc ye Jethu looi, ke kɔc juëc apɛi bö tënë ye pan Judia, ku gen Jeruthalem ku Idumiε, ku jɔl aa bëëi tö wär Jordan kɔu, ayï gen Tire ku Thidon.

⁹ Go Jethu lëk kɔcken ye buɔɔth bïk riäi guiir tënë ye bï yen la thïn, bïk cïi ber piny,

¹⁰ rin Jethu ëci kɔc juëc tuany kony. Go kɔc juëc kɔk tuany wïc bïk la tënë ye bïk la gɔɔt.

¹¹ Na tïɲ kɔc la gup jakrɛc ë ke cuɛt röt piny yenhom ku dhiεukë, “Yïn ee Manh Nhialic.”

¹² Go Jethu jakrɛc yöök bïk cïi nyooth.

Jethu acä atuuc kathiäär ku rou kuany

(Mt 10:1-4; Lk 6:12-16)

¹³ Go Jethu kɔcken wïc cɔl ku jiël ke ke, ku lek gat nhïim tē cïi ceɲ. Wën cï kek yet tën awën,

¹⁴ ke kuëny raan thiäär ku rou bei kɔc yiic. Ku ciëk ke ke cɔl atuuc ku lëk ke, “Wek aca kuany bäk rëer ke ʏa. Ku wek aba ya tuɔɔc aʏeer bäk wëtidië aa la piöc.

¹⁵ Ku wek aabi la riel bäk jakrɛc aa cuɔp wei kɔc gup.”

16 Kɔc ke cī Jethu kuany bīk ya atuöccke aayī, Thaimon (cī Jethu bēn cāk ke cɔl Pīter.)

17 Jemith Dhubedī kek wāmēnh koor cɔl Joon (kek aaci Jethu cāk ke cɔl Boanergeth, ku wētde yic kɔc ē mär den.)*

18 Ku Andria, Pilipo, Bartholomeo, Matheo, (cɔl Lebī) Thomath, Jemith wēn Alpawuth, Thadawuth, Thaimon,

19 ku jɔl a Judath Ithkariöt, raan wäär cī Jethu bēn luom bī dɔm.

Jethu aye yöök lɔn le yen guöp jɔnrac
(Mt 12:22-32; Lk 11:14-23; 12:10)

20 Nawēn ke Jethu dhuk Kapernaum. Go kɔc juēc apɛi bēn buoθh abī ciēn tē cɔk yen nhom lääu kek kacke bīk mīth.

21 Nawēn piŋ kɔc ruäai kek Jethu lɔn ye kɔc rēer kek ye ye lueel, lɔn cīi yen nhom path, gokē la nyaai.

22 Ku ēci kɔc kɔk piöc lööŋ Itharel bö Jeruthalem lueel, “Ala guöp riēl Beldhebul. Ee yen bēny jakrɛc, yen ye yiēk riēl bī ke aa cuɔp wei.”

23 Go Jethu ke yöök, ku thööŋ wēt ēlä, “Ye jɔnrac jɔn rɛɛc dēt cuɔp wei kädē.

24 Na tek kɔc paan tök keyiic ku thērke kamken, ke pan kēnē abī riääk.

25 Na tuum dhiēnh tök yenhom aya ku thērke kamken ē röt, ke dhiēnh kēnē abī wɛɛr aya.

26 Kēya, na tek jakrɛc keyiic ku thērke kamken, ka thök.

* **3:17** Ee duēr thöŋ kek tuóc pušu. **3:22** Mt 9:34; 10:25

27 “Acin raan lëu ye bī yōn raan ril dhoŋ ku nyεei kākke, akəŋ raan ril kēnē dəm ku der, ku jəl kāk tō baai nyaai.

28 “Wek aa lək yic lən nadē adumuööm, ku käreεc yekē ke looi, ku kāk yekē lueel, aa lëu bī ke päl piny ebēn tēnē kəc.

29 Ku na ye raan Wēi Nhialic yöök lən ye yen jəŋrac, ka adumuöömke aaci kəŋ päl piny akölrīēc ebēn.”

30 Ee lueel Jethu kälä ē rin cī kəc kək ye lueel, “Ka la guöp jakreεc.”

Man Jethu ku wämāthakēn aaci Jethu nyaai

(Mt 12:46-50; Lk 8:9-21)

31 Go man Jethu kek wämāthakēn ē Jethu bēn ku kēēckē ayeer ku tockē raan bī Jethu la cəəl.

32 Go kəc ke rēēr, ke cī ye gööm lək ye, “Moor ku wämāthakui aatō ayeer, ku aa wic yī.”

33 Go Jethu bēēr, “Yeŋa ē ma ku wämāthakāi?”

34 Ku kē wiēc bāk ŋic, kəc rēēr kek ya aa nhiaar, aa cīt paan ē ma.

35 Kwat raan wēt Nhialic looi yen ē wämāāth, ku nyankāi ku ma.”

4

Käəŋ dom path ku dom rac

(Mt 13:1-9; Lk 8:4-8)

1 Go Jethu bēn piöoc wär Galilia yəu. Nawēn le kəc juēc apēi gööm, ke la riāi yic ē piū thook ku nyuuc thīn, ku jəl kəc ebēn nyuc piiny ē piū thook ayeer.

² Ku jəl Jethu kēŋ aa lueel bī yen kəc piöc käjuēc, ku lək ke.

³ “Piēŋkē! Raan puör ěcī la dom bī la pur.

⁴ Ke wēn yen rap wεεr dom yic, ke kōth abək lööny dhēl yic. Go diēt bēn ku tetkē ke.

⁵ Ku lööny kōth kək aləl nhom tē koor tiəp thīn. Gokē guə cil.

⁶ Nawēn la akəl ruəl apēi ke rap awēn go yom, ku riεεukē rin kēc mēiken yet piny apath.

⁷ Ku lööny kōth abək tē ye tiim la kuəəth cil thīn, na la tiim juək ke dec rap ku cīk lok apath.

⁸ Ku lööny kōth kək tiəm path yic, ku ciilkē apath ku diitkē ku lökkē apath. Rap abək aake cī luək ke thoi nhīim, ku kək ke thööŋ röt, ku rap kək ke dit nhīim.”

⁹ Ku wit Jethu lōŋde ělä, “Piēŋkē tē le wek yiŋth.”

Wēt thöəth ě kääŋ

(Mt 13:10-17; Lk 8:9-10)

¹⁰ Nawēn cī kəc juēc jäl, go atuöccke kathiäär ku rou, ku kəc ke cī döŋ kek ye, thiēc bī kēŋ teet yiic tēnē ke.

¹¹ Go lək ke, “Wek aaci nyuəth kē cī rot moony ě bääny Nhialic yic, ku kəc kək kēc gam aabi kəŋ ŋic tē lək ke kēŋ,

¹² këya, rin na cək alən ye kəckä daai, ka cīi kəŋ bī tīŋ. Ku na cək alən ye kek wēt piŋ, ka cīk bī deet yic. Na ke bī röt waar, ŋuət aa kəŋ tīŋ ku detkē keyiic. Ku ŋuət aaci röt thōn Nhialic, ku pēl wēt piny tēnē ke.”

Jethu aci kääŋ raan puör teet yic

(Mt 13:18-23; Lk 8:11-15)

13 Go Jethu lək ke, “Na këckë kääŋ kënë deet yic ke wek aaciï kəŋ kək bï deet yiic.

14 Kəth cï com aa cït wətdiēn ya piöc tənē we.

15 Kəc kək aa cït kəth cï lööny dhəl yic, ye diēt ke tet. Tē piŋ kek wēt Nhialic, ke jəŋrac bə ku nyεei wēt awən kepuəth ku mērkē nhüim wēt ē Nhialic.

16 Kəc kək aya aa cït kəth cï lööny alel la nhom tiəm koor ye rap guə yom thïn, rin këc mēiken yet piŋy. Ku kəc kək aaciït kəth cï com alel nhom, aa löŋ Nhialic gam nyin yic ke mit puəth.

17 Ku aacie kepuəth ye dεēt, aa wēt Nhialic guə wai wei tē looi aliäap rot, ku tē yəŋ ke rin wēt Nhialic.

18 Kəc kək aya aa cït kəth cï lööny tē ye tiim la kuəəth cil thïn, keek aa wēt Nhialic piŋ,

19 ku käjuēc ke diir, rin pïr pinynhom ē tən, nhiēr jïεek, ku käpuəth yekē wïc aa bən thïn, ku rεckē löŋ Nhialic kepuəth.

20 Ku kəc kək aa cït kəth cï puur tiəm path yic, keek aa löŋ Nhialic piŋ ku gamkē apei, ku käjuēc path aaye yök tənē ke, cïmēn rap cï ηiεc luək ke thoi nhüim, ku rap kək ke thööŋ kenhüim ku kək ke dït nhüim.”

Kääŋ mermer

(Lk 8:16-18)

21 Ku ben ke thiēc, “Le raan cï mermer kaŋ yəth yöt ku kum nyin, nadē ke tēəu agen təc cök, cie tösü yöt ciel yic?

22 Kuat kë cï thiaan, aŋot bï rot nyuəəth, ku wēt Nhialic aŋot bik piöc.

23 Piεŋkē, tē le wek yïth!”

Kääŋ tē ye kǎŋ thōŋ thīn

²⁴ Ku ben lēk ke ēlā, “Tē ye wek kǎc kǎk luōŋi thīn yen ē tē bī Nhialic we luōŋi thīn aya. Detkē kāk yakē ke piŋ!

²⁵ Rin raan la kēdāŋ abī bēn muōc, ku na ye raan cīn kēdāŋ, ke kēthiin ye tak lōn tō yen tēnē ye, abī nyaai aya.”

Jethu acī kääŋ lueel rin wēt Nhialic

²⁶ Ku la Jethu tuen ku lueel, “Bääny Nhialic ē duēr thōŋ kek kēnē. Monytui ēcī kōth wēer dom yic.

²⁷ Ee rēer akōlakōl ku kōth awēn cī com aa la tuen ke cil ē rōt, ke pīr ku dūtkē ku akuc kēn ē ke looi kēya.

²⁸ Kōth ēbēn aa cil piiny tiōp yic. Kāu ē kaŋ lou ku bīi yiēny tōk bei, ku jōl la tuen ke dīt agut tē bī yen deer ku yeer ku lok.

²⁹ Ku tē cī kek luōk aaye tem rin cī tēn tēmtēm bēn.”

Kääŋ kāu koor nyin ye tiemde dīt apēi

(Mt 13:31-32, 34; Lk 13:18-19)

³⁰ Ku ben lueel, “Yenō buk thōŋ bääny Nhialic? Ye kääŋ piath ŋō buk thōŋ ye?

³¹ Bääny ē Nhialic acit kāu koor nyin cī raan com duōmde.

³² Ku na le dīt ka la nhial ke loi kēr ku yīth dīt apēi, abī diēt yōōtken aa yīk thīn.”

³³ Jethu acī Wēt Puōth Yam piōōc tēnē kǎc ē kēŋ cīt kēŋkā. Aake cī lēk kǎjuēc lēukē bīk ke deet yiic.

³⁴ Ee ye kəc jääm ë këñ tã piööc yen kəc, ku na ye yeen ë rot kek kacken ye buəth, ka ye tët këriëc ëbën yiic.

Jethu aci yom cəl akääc
(Mt 8:23-27; Lk 8:22-25)

³⁵ Na aköl dët ɣonthëi, ke lëk Jethu atušöcke, “Lok teemku wär abɛtɪ.”

³⁶ Gokë kəc kək nyääñ piny, ku lek riän awën rëer Jethu thïn yic, ku tëmke agut Jethu. Ku riëth kək ke tš thïn aaci tem aya.

³⁷ Kaam thiin awën ke yomdit apeɪ jət rot, ku jət atiaktiak rot abï riäi duër thiäñ ë piu.

³⁸ Tëwën looi këne rot, Jethu ë nin riäi yic ciëen, ke ci yenhom kan. Gokë pušöc ku luelkë, “Bänydal ɣok aa muəu, ciï diɛer ë ɣo?”

³⁹ Go Jethu rot jət ku rël yom, “Lə dil!” Ku rël atiaktiak, “Kääc!” Go yom köšc ku le dil.

⁴⁰ Ku thiëc ke, “Yenö rišöc wek ciët we bi mou? Cäk ɲic lən bi ɣen we kony?”

⁴¹ Gokë nhïim la cöt riëldit cit këne ku jiemkë kamken, “Ye raan yindë këne? Na cək a yom ku atiaktiak ë ke piñ wëtde!”

5

Jethu aci raan la gušp jakrɛc kony
(Mt 8:28-34; Lk 8:26-39)

¹ Gokë wär Galilia teem ku lek tã cəl Jeratha.

² Kaam wën keɛc Jethu piny riäi yic, ke tiñ mony la gušp jakrɛc, ke bö bei rëñ nhïim.

³ Mony këne ë ye rëer rëñ nhïim, ku acin raan ye lëu bi rëk.

⁴ Ee ye rëëk cök ku cin arak juëc, ku ɲot ke tueny, ku dhonɲ luɔŋ kəth yecök. Ee ril apɛi, acin raan ye lëu bi rëëk.

⁵ Aköl ku wëër thok ëbën, ee ye cool ku ruu kat rɛŋ nhïim, ke looi duɔɔt ku ye rot dɛɛny aleel bi rot nök.

⁶ Wën tiŋ yen Jethu tɛmec, ke lor ku cuɛt rot piny yenhom,

⁷⁻⁸ ku lueel Jethu, “Jɔŋrac, bäär bei ë mony kënë guɔp.” Go kiɛɛu looi apɛi, “Jethu Wën Madhəl, yenɔ wic ba looi tənë ɣa? Yin aləŋ ë rin Nhialic duk ɣa tɛm awuɔc.”

⁹ Go Jethu jəl thiëc, “Cəl yi ɲa?” Go bëër, “ɤɛn aa kut rin ɣok ajuëc.”

¹⁰ Ku jəl mony kënë Jethu ya ləŋ bi jakrɛc cii cop wei tɛden rëër kek thïn.

¹¹ Ku duut dir baai ë nyuäth ɣot cök ë tən awën.

¹² Go jakrɛc Jethu ləŋ, “Tuɔɔc ɣo ë dirkä gup, ku cəl ɣo aa lur keyiic.”

¹³ Goke puöl, ku jəl jakrɛc bën bei mony awën guɔp ku lek dir gup. Go duut diëër, kecit tiim karou riŋ agör yic, ku thootkë wiir ku moukë ëbën.

¹⁴ Go röör ke biöök dir kat, ku lek kē cī rot looi lueel tənë kəc rëër geeu, ku kəc tō bëëi yiic. Go kəc ëbën jal wɛt bik kē cī rot looi la tiŋ.

¹⁵ Nawën lek ɣet tənë Jethu, ke yök mony wäär la guɔp jakrɛc ke rëër, ke ceŋ alath, ke la nhom cök. Gokë riɔc.

¹⁶ Go kəc ke cī kən cī rot looi tənë mony awën ku dir tiŋ, la lək kəc kək.

¹⁷ Ku wën piŋ kəc baai ë wɛt kënë ë ke riɔc, ku lek tənë Jethu ku ləŋkë bi jəl panden.

18 Tëwën le Jethu riäi yic, go mony wën cï Jethu jəŋrac cəl ajiël yeguöp bën tənë Jethu, ku ləŋ bï cath kek ye.

19 Go Jethu jai, ku lək ye, “Ləor baai tənë kacku ku lək ke kajuëc cï Bëny looi tənë yï, ku təpuəth cï luöi yï.”

20 Go jäl ku le panden Dekapolith la yic γευ thiäär. Ku kueny keyiic ebën ke ye kəc lək kək cï Jethu looi tənë ye. Go kəc gäi.

Jethu acï tik kony ku cəl nya aben pïr

(Mt 9:18-26; Lk 8:40-56)

21 Wën cï Jethu bən tem riäi bï dhuk Kapernaum, ke kəc juëc apəi bö tənë ye wär yəu.

22 Kaam wën ke raan cəl Jariöth, bëny tən amat kəc Itharel bö aya. Nawën tïŋ Jethu, ke cuet rot piny yecök.

23 Ku ləŋ, “Nyandiën thin koor acï dhal apəi, athou. Bäär ba yicin la täau yenhom bï pial.”

24 Go Jethu gam ku lööny dhöl kek ye. Ku buəth kəc juëc ke, ke cïk kum apəi.

25 Ku tïŋ tuany, cïi thəkde kəu ye tεem ruöön thiäär ku rou, ee tō kəc yiic,

26 ku yeen ëcï wëu juëc gäm akim rin bï tuaanyde ηuëën, ku tuaanyde akëc ηuëën, ëcï rot jal juak.

27 Ku yeen ëcï kək ye Jethu looi piŋ. Go bën Jethu kəu ku gəot alanhde,

28 rin ëcï jam ë rot yepuəu ëlä, “Na gaat alanhde, ke γen abï pial.”

29 Kaam thiin awën ke riem cïi ben kuër, ku yök rot ke cï pial.

30 Go Jethu yök lön cii riël jäl yeguöp. Go yenhom wel ku thiëc kəc, “Yeŋa cä alanhdië gəot?”

31 Go kacken ye buəoth lək ye, “Yin ë kəc juëc tiŋ ke cï yi kum ku ye thiëc, Yeŋa cä gəot?”

32 Go Jethu ɲot döt kəc bi tiŋ yeŋa cï ye looi.

33 Wën ɲic tiŋ awën tuany ye ke tuaany cï jäl yeguöp, go bën tənë Jethu ke cï riöc, ke ləth, ku gut yenhiaal piny Jethu nhom. Ku lək ye lön ë yen cï ye gəot.

34 Go Jethu lueel tənë ye, “Nyaandië, gamdu aci kony ba pial, ləor, kek döör.”

35 Kaam wën jiem Jethu, ke kəc riŋ pan Jariöth ku lëkkë ye, “Nyaandu aci yet wei, duk raan piöc ben räam nhom.”

36 Ku Jethu ë këc kë cik lueel kuëc nhom, ku lək ye, “Duk riöc, dæet yipuəu ku gam wët yic.”

37 Ku ë cïn kəc juëc cii puöl bik cath kek ye, ee Piter ku Jemith ku Joon kepëc.

38 Tëwën yeet kek pan Jariöth ke Jethu yök kəc ke näk röt, ke dhiau apëi.

39 Ku ler yöt ku lək ke, “Yeŋö nëk wek röt? Ye dhiëndiit ɲö kënë? Meth akëc thou, anin.”

40 Gokë däl guöp. Go Jethu ke cäl ala ayeer, ku cäl wun meth kek man meth ku kacken awën kadiäk, ku lek yöt tëwën cï meth täac thin.

41 Ku däm cin ku lək ye, “Nyan thin, alək yi, jot rot!”

42 Go rot jot nyin yic ku ciəth. Go kəc awën tö yööt kek Jethu gäi apëi wën tiŋ kek kë cï rot looi (ë ye run thiäär ku rou.)

43 Ku thən Jethu ke bik cii lək kəc kək. Ku lək ke bik yiëk miëth.

6

Kəc Nadharet aa kəc Jethu gam

(Mt 13:53-58; Lk 4:16-30)

¹ Go Jethu jäl tēden awēn ku ler genden Nadharet, ku buəθh kəcken ye buəθh.

² Nawēn aköl ē ləŋ, ke piəöc tēn amat. Ku kəc juēc aake tō thīn. Nawēn piŋkē piəöcde ke gēi, ku luelkē, “Cī kəŋ bēn aa ŋic nēn?” “Ku ye kəkəkə looi kədē?”

³ Yen ē raan guēŋguēŋ tiim, ku ē wēn Maria, ku ē mēnh ē Jemith, ku Jothep, ku Jut ku Thaimon. Ku cie nyiērakēn kā rēēr ē tēn kek ɣo?” Ku jəlkē jai bīk piəöcde cīi gam.

⁴ Go Jethu lək ke, “Raan cī Nhialic lööny yeguöp aye baai ēbēn theek, ka kəc genden ku kəc ruāāi kek ye, ku paan wun kek paan man kek aacīi ye ye theek.”

⁵⁻⁶ Ku akēc lēu bī kək jəŋ gōi looi, ka kəc tuany lik kek aaci yen yecin tāäu kenhīim, ku kony ke bīk pial. Ee cī gāi apei rin kēc kek ye gam.

Jethu acā atuöccke kathiäär ku rou tooc

(Mt 10:5-15; Lk 9:1-6)

Go Jethu jäl ku ler bēēi kək yiic ku le kəc piəöc thīn.

⁷ Ku tuum atuöccke ku tooc ke wei, bī kəc karou aa cath ē tək bīk aala piöoc Wēt Puəθh Yam ē Nhialic, ku yīk ke riēl bīk kek kəc aala kony.

⁸ Ku lək ke apei. “Duökkē muk ē miith yakē cam dhēl yic, muökkē ke wei kepeç.

⁹ Cēŋkē war ku duökkē muk alēth kək.”

¹⁰ Ku lək ke aya, “Yakē rēēr pan ye we lor thīn yet tē bī wek jäl.

11 Ku na lak pan cii we lor thïn, ku pan cii wêlkun ye piñ thïn, ke we jiël ku tɛŋkê wecök. Ku abi nyooth lön ci wek kuc ec ke!”

12 Ku jiëlkê ku lek kəc piöc bik luoi adumuööm puöl.

13 Ku copkê jakrɛc juéc wei, ku təc kəc juéc tuany nhïim. Ku röökkê bi ke kony bik pial.

Nääk ë Joon raan kəc muöc nhïim

(Mt 14:1-12; Lk 9:7-9)

14 Ku bëny Antipäth Yërot ëci wët piñ rin ci ke Jethu ɲic apɛi. Ku ë ye kəc kək lueel, “Joon raan kəc muöc nhïim aci ben pïr, ee yen ale yen riel yen käckä looi.”

15 Ku lueel kəc kək, “Mony kënë adhil a Elija raan wäär kək Nhialic tiñ.” Ku ben kəc kək lueel, “Ee raan tök kam kəc thɛɛr, kəc kək Nhialic tiñ.”

16 Ku wën piñ Antipäth Yërot ë wët kënë go lueel, “Ee Joon raan kəc muöc nhïim wäär ca cöl atök yeth yen aci jət thou yic.”

17 Antipäth Yërot ëci Joon cöl anak këlä, ee ci cöl adəm ku rek, ku cöl amac rin wët Yërodia tiñ Pilipo wämënh ci rum bi ya tiɛnde,

18 rin ci Joon ye lueel tënë ye ëlä, “Acii path ba tiñ wämuuth rum ke pïr.”

19 Ku Yërodia ëcii puöu mit tënë Joon rin ë wët kënë. Ku wïc diët nək ku cii lëu,

20 rin Yërot ë riöc Joon, rin ye Joon raan puöth wët Nhialic, ku kony bi ciën kē nək ye. Nawën piñ Yërot wët Joon, ke gëi apɛi ku ɲot nhiɛɛr bi wël Joon aa piñ.

21 Nawën ke Yërodia jəl tē bī yen Joon nāk thīn yök, ku ē ye aköl looi Antipäth Yërot yan akölden dhiëëth ye, tēnē kacken dīt mɛc kek baai, ku bāny apuruuk ku jəl aa kəcdīt pan Galilia.

22 Ku nyan Yërodia nhom guəp, ee cī bēn yɛɛi bī bēn dier. Go Yërot kek jäälke puəth miet apɛi tēnē ye. Go Antipäth Yërot bēny lək ē nyan əlä, “Na le ke wīc, ke luel tēnē ɣa ku ba gām yī.”

23 Ku kuëñ tēnē ye jööl nhīim ku lueel, “Kuat kədun ba thiëc tēnē ɣa aba dhiel yiək yī, cək alən ē yen aban ē bäänydië.”

24 Go nya la aɣer ku lək man, “Yenjö ba thiëc?” Go man lueel, “Lək ye bī Joon raan kəc muəc nhīim tək yeth, ku gēm yī nhiamde ba bēi.”

25 Go nya dhuk tēnē bēny nyin yic ku lueel, “Yin awiëc ba gām nhom Joon raan kəc muəc nhīim tən emən thiin, ke cī tāau aduək yic!”

26 Kēnē acī bēny rac puəu apɛi, ku akēc kued rin cī yen mēl kuëñ ē jööl nhīim.

27 Go bēny apuruəkde tooc nyin yic, ku lək ye bī nhom Joon raan kəc muəc nhīim bēi. Go apuruk la tēwën mɛc yen thīn ku tək yeth.

28 Ku bīi nhom ke cī tāau aduək yic, ku yīk nya, ku jəl nya gām man.

29 Nawën piñ kəc Joon buəth lən cī ye nək, gokē la ku nyɛɛikē guəpde ku thiäkkē.

Jethu acī miëth koor juak bī kəc juëc cam

(Mt 14:13-21; Lk 9:10-17; Jn 6:1-14)

30 Kəc Jethu buəth aake ye bēn yenhom ku lək kē kək cik looi, ku kək cik piəc ebən.

31 Kəc juëc apɛi aake ye wäac, kəc jiël ku kəc bö tēnē Jethu bī ke bēn kony, abī Jethu kek atuöcke

cii lääu bik cak mïth. Go lëk atuöocke, “Jiëlku buk la tē cïn yic kəc buk la löŋ.”

³² Gokë jäl ë riäi ë röt bik la tē cii ceŋ, ku aake kəc kəc lëk tē ler kek thïn.

³³ Go kəc juēc ke tïŋ, ku ŋickë ke. Gokë miööt gæeth yiic ku riŋkë tueŋ ke kuany wär köu, ke la tēwën cï Jethu kek atuöocke kenhïim wël thïn. Ku ye kek kəŋ yet tēwën.

³⁴ Wën keεc Jethu piny riäi yic, ke tïŋ kəc juëckä. Go wïc bï ke kony rin acï tïŋ kecit amël pap cïn nhïim abiöök. Ku jəlke piööc käjuēc.

³⁵ Nawën col piny, ke kacken ye buöoth bö tēnë ye ku luelkë, “Piny acï cuəl ku tēn ë ror cïn kē kuany thïn,

³⁶ cəl kəc aa jiël bik la bëëi yiic bik la γəac miëth camkë.”

³⁷ Go bëër, “Miackë ke ë miëth.” Gokë lëk ye, “Wïc buk ayuöp lëu ë kəc kithkă γəac tēnë ke bik ke cam? Aa wïc wëëu juēc apëi.”

³⁸ Go Jethu ke thiëc, “Ye ayuöp kadë tō thïn? Lak bāk ke la tïŋ.” Gokë dhuk ku lëkkë ye, “Aa yuöp kadhiëc ku rec karou.”

³⁹ Go lëk ke bik kəc cəl anyuc piiny akuut noon tōc nhom.

⁴⁰ Gokë nyuc piiny akuut buət ku akuut thiärdhiëc.

⁴¹ Go ayuöp awën kadhiëc ku rec karou lööm, ku döt nhial ku leec Nhialic. Ku beny ayuöp yiic ku gëm ke kacken ye buöoth bik ke tek agut rec, tēnë kəc.

⁴² Ku mïthkë abï miëth ke göök.

⁴³ Ku jəl kacken ye buəth awuthueei ayuöp ku rec cī döŋ piny kuany gääc kathiäär ku rou.

⁴⁴ Kac ke cī mīth ebën, röör röt aake ye tiim kadhiëc.

Jethu aci cath pīu nhīm
(Mt 14:22-33; Jn 6:15-21)

⁴⁵ Kaam thin awën, ke Jethu yöök kacken ye buəth bik la riäi yic, ku lek tueŋ yenhom agör aləŋtui gen cəl Bethaida. Ku cəl thēi ajiël.

⁴⁶ Wën cī yen kac tšöŋ, ke jiël bi la gət nhom bi la rööc.

⁴⁷ Nawën la thēi bën, ke atušöcke aake ŋoot ë riäi yic wär ciel yic, ku yeen ë rot agör nhom.

⁴⁸ Goke tīŋ ke cī gök gēr ë riäi rin cī kek kenhūim wəl yom. Nawën bääk ë piny, ke bö tēnë ke ke cath pīu nhīm, ku ë wic bi ke waan thook.

⁴⁹ Ku wën tīŋ kek ye ke cath wiir pīu nhīm, ke tīŋkë kecīt atīm raan cī thou, ku dhiεukë,

⁵⁰ rin ë cik tīŋ kedhie ku rišöckë.

Go guə jam tēnë ke ku lueel, “Dεεtkë wepuəth, ee yeŋ Jethu, duökkë riöc.”

⁵¹ Ku mēt rot riäi yic tēnë ke. Go yom kööc. Gokë gäi apēi,

⁵² ë rin këc kek kēnë ayuöp wäär cī gām röör tiim kadhiëc deet yic, rin ril kek nhīm.

Jethu aci kac tuany Jenetharet kony
(Mt 14:34-36)

⁵³ Nawën aköl dēt cī kek wär teem, ke yet Jenetharet tš agör nhom ku dömke riäi.

⁵⁴ Nawën bikkë bei ë riäi yic, go Jethu guə ŋic kac ebën.

⁵⁵ Gokë kat ku rinjë bëëi yiic ku lek kəc tuany kət, ku ɣəthkë ke tē cī kek ye piəŋ thīn.

⁵⁶ Ku kuat tən cī Jethu la thīn ëbën, bëëi yiic ku gəeth yiic, kəc juəc tuany aake ye tääc tənë ɣəc ku dhəl yiic, ku ləŋkë bīk gəət, cək alanhde thok ë path. Ku kuat raan cī ye gəət ëbën, ee ye pial.

7

Jethu aci ciəŋ kək wärkuan dīt dhəlyiic (Mt 15:1-9)

¹ Wën cī Parathī kek kəc piöoc lööŋ kəc Itharel, ke cī bën Jeruthalem Jethu gööm piny.

² Ke tiŋ kəc Jethu buəth ke mīth ke kəc kecin lək apath, bīk ajuəc nyaai kegup cīt tē ye kəc Itharel ye luəi thīn.

³ Kəckä aake cī kē cī atuuc Jethu looi rac puəth, rin kəc Itharel kek Parathī, aake cīi ye mīth tē kəc kek kecin kaŋ lək kecīt ciəŋ thəer kəcken dīt.

⁴ Ku na le mīith cīk la bëëi geuu, ka cīk cam ke kəkë kaŋ lək kəth. Ku keek aake ye kək cī kəcken dīt thəer lək ke looi, cīmən lək bīiny ku tōny ku aduuk ë miəth.

⁵ Go Parathī ku kəc piöoc ë lööŋ Jethu thiēc, “Yeŋö cīi kəckun yī buəth ye ceŋ ë ciəŋ wärkuan dīt, ku yekë mīith juääk ke kəc kecin lək?”

⁶ Go Jethu bëer, “Ithaya aci yic lueel ë rienkun lən ye wek awəŋ puəth rou, ku gət ëlä, ‘Kəckä aa ɣa leec kethook ku aliu kepuəth.

⁷ Keek aa ɣa door ku acie duəör ë yic, rin keek aa kəc piöoc lööŋ ciəŋ wärkuan dīt ciət ke ye löŋkié!’

⁸ “Ee yic, wek aacit kɔc ye Ithaya jam ë riɛnken. Wek aaci kuc lōōŋ Nhialic ku ye lōōŋ ciɛɛŋdun kek yakë gam.”

⁹ Ku lëk Jethu ke, “Ayakë tak lɔn ë yen këpath yen cäk looi ye wek kuc lōōŋ Nhialic, ku muökkë ciɛɛŋdun thɛɛr.

¹⁰ Rin aci Mothith lueel, “Thek wuur kek moor, ku na ye raan wun kek man jääm gup käreɛ, ka dhil nök bi thou.’

¹¹ Ku ayakë lueel aya lɔn ye yen yic, bi raan wun kek man jäi tɛ wïc kek këpür kek tənë ye, ‘Acin tɛ kuöny we, rin ɣɛn aci Nhialic gäm kën ba yiëk we.’

¹² Ke wek aa kuc bi kakkä cii loi tənë wun ku man.

¹³ Këya, tɛ ye wek kɔc piöc thïn aci thōŋ kek wël ye Nhialic lueel. Ku wek aa käreɛ juëc kök cit kakkä looi aya.”

¹⁴ Go Jethu kɔc juëc bɛn cɔl ku lëk ke, “Piɛŋkë wëtidië wedhie ku dɛtkë yic.

¹⁵ Acie kë ye raan cam, yen ye cɔl aye raan rac, aa käk ye tak ku käk ye lueel, ku käk ye looi kek aaye cɔl aye raan rac. [

¹⁶ Piɛŋkë tɛ le wek yith.”]

¹⁷ Wën ci yen kɔc nyääŋ piny ayeer ku ler ɣöt, ke thiëc kɔcken ye buöth bi wët awën ci lueel teet yic tənë ke.

¹⁸ Go lëk ke, “Cäk kãŋ ye deet yiic aya? Acie miëth ye raan cam yen ye cɔl ala guöp adumuööm,

¹⁹ rin acie la yepuöu, ee la yeyäc ku le bën bei.” Këya, aci Jethu nyuöth lɔn miëth ëbën apath.

²⁰ Ku ben lëk ke, “Aa käk ye raan tak ku looi ke, kek aa rɛc.

²¹ Rin pušu yen aye käreç ye looi bën bei thïn, cïmën bal ku ruööm, ku nääk raan ë path, ku kör diäär.

²² Ku kook ku wëen ku nhiam ku tiεel, ku yik yepušu kënë raandä, ku luööm ku kuat käreç ëbën.

²³ Käkä ëbën aa bën bei raan pušu, ku looi ke ku rεckë ye.”

Tiη cï gam lön bi Jethu nyaande kony

(Mt 15:21-28)

²⁴ Ku jöl Jethu jäl ku ler wundät tæthiääk kek Tire ku Thidon, ku ler yöt. Ku cïi wïc bi la raan ηic ye. Ku akęc lëu bi thiaan.

²⁵ Go tiη la nyanden koor ηot kęc kuäc cï jəηrac la yeguöp, Jethu piη. Go bën tënë ye ku gut yenhiaal piny Jethu nhom.

²⁶ Tiη kënë ë ye jam thon Girik, ku ee nyan pan Ponicia. Go bën ku ləη Jethu ëlä, “Bëny, cök a lön cï yen ye tiη pandun ke yi bö ba jəηrac cuöp wei nyaandië guöp.”*

²⁷ Go Jethu lueel, “Yen ya cïi bö ba miëth mïth bën gäm jök. Acie yic bi miëthden yiëk jök, ke kęc kueth.”

²⁸ Go bëer, “Ee yic Bëny, ku jök rëer tē mïth kəc thïn awuthueei cï lööny piny kuany.”

²⁹ Go Jethu lək ye, “Rin cï yin ye ηiec bëer këya, dhuäk baai, yin abi jəηrac yök ke cï jäl nyaandu guöp!”

³⁰ Go dhuk baai ku yök nyaande ke cï təc biöök yic, ku jəηrac ke cï jäl yeguöp.

Jethu acï raan miη cie jam kony

³¹ Go Jethu jäl Tire ku dhuk wär Galilia ke kuany gεeth kathiäär Dekapolith yiic ku Thidon.

* **7:26** Tiη kënë ee cie nyan Itharel.

³² Tëwën ke kəc kək bii raan cī miŋ tənë Jethu, ku länkë bī gəət.

³³ Go Jethu nyaai kəc yiic ku ɣəth tēde ë rot, ku tēəu yecin yeyiç, ku ŋuut ku gəət liep.

³⁴ Ku döt nhial ku wëei apei ku lək ye, “Piəŋə!”

³⁵ Kaam thiin awën, ke ɣər yiith ku jiem.

³⁶ Ku yöök Jethu kəc awën tō thīn bik cii lək raan dət. Ku ŋot lek lueel.

³⁷ Ku kəc cī ye piŋ aaci gäi apei dīt ku luelkë, “Mony cəl Jethu kënë aci kəriëec ëbën lëu. Kəc cī miŋ aa piŋ emën, ku kəc ke cie jam, aaci ya jam aya.”

8

Jethu aci raan tiim kaŋuan cəl akueth (Mt 15:32-39)

¹ Ye ninkä, ke kəc juëc mat kenhüim. Nawën cīn miëth ke Jethu cəl kəcken ye buəth ku lueel,

² “ɣen aci guəp ŋəŋ, rin kəkä aaci rëer kek ɣa nīn kadiäk emën, ku acin kë camkë.

³ Na cal ke aa dhuk bääiken yiic, ke cīn kë cik cam, ka la wiik dhël yic, rin kəc kək aabö tēmec.”

⁴ Go kəcken ye buəth lək ye, “Ye tənən roor ë tən bī raan miëth yök thīn bī kəc juëckä cam?”

⁵ Go Jethu ke thiëec, “Lak ayuəp kadë?” Gokë lueel, “Aa dhorou.”

⁶⁻⁷ Go lək thän awën bik nyuc piiny. Ku lööm ayuəp awën kadhorou ku rec thii lik ku röök Nhialic, ku bəny keyiic, ku gëm ke kəcken ye buəth bik ke tək kəc. Gokë looi këya.

⁸⁻⁹ Ku jəl thän awën, kecīt tiim kaŋuan mīth bik kueth. Ku jəl kəc Jethu buəth awuthueei ayuəp cī döŋ kuany gäac kadhorou. Ku jəl Jethu kəc cəl ajiël,

¹⁰ ku ler riäi yic kek kacken ye buoath, ku lek pan cəl Dalmanutha.

Jethu aci kuc bi kënë jän göi looi

(Mt 16:1-4)

¹¹ Tëwën ke Parathï kək ben bën tənë Jethu ku teerkë wët kek ye, ku wickë bik deep ë wët, gokë yöök bi kënë jän göi looi, bi nyuöth ke lön ye Nhialic wëlke gam.

¹² Go Jethu keŋ apɛi ku lueel, “Yeŋö ye riëc aköl thiëc kënë jän göi. Wek alëk yic. Acin këcit kënë bi nyuöth ke.”

¹³ Ku nyiëŋ ke piny, ku dhuk riäi yic, bi teem wär aləŋtui.

Duökkë ye tak cimen Parathï ku Antipäth Yërot

(Mt 16:5-12)

¹⁴ Kəc Jethu buoath aake ci nhïim määŋ bik ayuöp juëc cïi muk wën ler kek riäi yic, ku mukkë ayuöm tök gilij.

¹⁵ Go Jethu lëk ke, “Tiëerkë nhïim, ku tiëtkë röt bək cïi nhiam cimen Parathï ku Antipäth Yërot, nhiaamden ke cəl ago puör cimen ayum ci yiëk yic luəu.”

¹⁶ Gokë jam kamken ëlä, “Ee wët kënë lueel rin cïn yok ayup.”

¹⁷ Go Jethu kë luelkë guə ŋic, ku thiëc ke, “Yeŋö ye wek ye tak wek acin ayup. Cäk kəŋ ye tak lön bi yən we muəc ayup. Cäk kəŋ ye tiŋ ku detkë keyiic, kua cäk puöth cər?”

¹⁸ Wek aala nyin, cäk ye daai? Ku wek aala yith, cäk ye piŋ ku cäk ye tak?

8:11 Mt 12:38; Lk 11:16 **8:12** Mt 12:39; Lk 11:29 **8:15** Lk 12:1

8:18 Jer 5:21; Edhe 12:2; Mk 4:12

19 Ye gäac awuthueei kadë cäk bën kuany wäär benny yen ayuöp kathiëc yiic tënë rööor tiim kadhiëc?” Gokë bëër, “Ee gac thiäär ku rou.”

20 “Na wäär benny yen ayuöp kadhorou yiic tënë raan tiim kañuan, ye gäac awuthueei ayuöp cï döñ piny kadë cäk bën kuany?” Gokë lueel, “Aa dhorou.”

21 Go Jethu ke thiëc, “Ku këya ëmën ñot cäk ye deet lön le yen riel ba miëth gäm we?”

Jethu aci mony cöör pan Bethaida kony

22 Gokë bën Bethaida. Go kəc kök mony cï cöör thel tënë Jethu, ku läñkë bï goot.

23 Go Jethu cöör däm cin ku thel wei baai. Nawën cï ñuöt nyin, ke tëëu yecin yenyin ku thiëc, “Le kë ye tñ?”

24 Go yenhom jot ku lueel, “Yen acie daai apath, yen ë kəc tñ kecit tiim kek cath.”

25 Go Jethu yecin bën tääu yenyin, go daai ku tñ këriëc ëbën apath.

26 Go Jethu cöl adhuk paande ku thön bï cïi la lëk kəc kök.

Pïter aci Jethu ñic

(Mt 16:13-20; Lk 9:18-21)

27 Go Jethu kek kocken ye buoath la Cetharia Pilipi. Tëwën ciëth kek, ke thiëc Jethu, “Lëkkë ya, ye jän tak ye yen ë ña?”

28 Gokë lueel, “Ayekë lueel lön ye yïn Joon raan kəc muöc nhïim. Ku lueel kuat dët lön ye yïn Elija, ku kəc kök ayekë lueel lön ye yïn raan tön kam kəc käk Nhialic tñ.”

²⁹ Goke thiëc, “Na week yakë lueel lön ye yen ña?” Go Piter bëer, “Yiin nhom guöp, yin ë Raan cï loc ku dɔc.”

³⁰ “Kë ca lueel ë yic Piter.” Ku lëk ke, “Duökkë lëk raan dët.”

Jethu ë jam Arɛmde ku Thuɔnde
(Mt 16:21-28; Lk 9:22-27)

³¹ Nawën ke jəl Jethu piöc ëlä, “Manh Raan abi dhieł reem, ku yeen abi kɔcdit baai, ku bány kək Nhialic ku jəl aa kɔc piöc lööŋ kɔc Itharel jai, ku näkkë. Ku yeen abi nın kadiäk nök piiny ë ran yic, ku ben pır ku jət rot ran yic.”

³² Ku teet kënë yic apath tënë ke. Go Piter miət wei kɔc yiic ku yöök bi cii ye jam këya.

³³ Go Jethu yenhom wel ku tıŋ kacken ye buəth ku rël Piter ku lueel, “Jäl ɣalööm jəŋrac. Wic ba kək cï Nhialic guiir waar yiic! Kək ye tak aacie kək Nhialic, aa wël raan ë path.”

³⁴ Ku jəl Jethu kacken ye buəth cɔł ku lëk ke, “Na le raan wic bä buəth, ka dhil nhom määär kəpuəth bi yök piërde yic pinynhom ë tən. Ku dhil puəu riel ku buəth ɣa, cək alön wic kɔc kək ye bik nök ë rienkië.

³⁵ Rin raan wic ye bi wëike kony aabi muör, ku na ye raan mär wëike ë rienkië ku rin piöcdië, ka bi wëike muk akölrüëc ëbën.

³⁶ Yenö bi raan kuany thin, bi jak apeı pinynhom ku mär wëike?

³⁷ Pır wëi akölrüëc apath, acın kë lëu bi ye waar.

³⁸ Na ye raan guöp yär ɣa ku piöcdië ë riëc cii ye wic bi wët Nhialic gam, ke Manh Raan abi guöp

yär ye aya, aköl dhuk yen kek diik Wun kek atuuc Nhialic.”

9

¹ Ku le tueñ ku lueel, “Wek alëk yic, ala kəc kək rëër ë tën, aacii bi thou agut tē bi kek ya tiñ kek riel ye nyuəth lən ye yen bëny ci Nhialic loc.”

Jethu aci guäpde rot waan
(Mt 17:1-13; Lk 9:28-36)

² Nawën nin kadätem cök, ke Jethu cäl Pïter ku Jemith ku jəl a Joon, ku lek gən bär apɛi nhom kepɛc. Kaam wën rööc kek, ke tiñ Jethu ke ci rot waan,

³ ku jəl aläthke yer apɛi abik la diardiar.

⁴ Nawën ë ke tiñ Elija ku Mothith ke jam kek Jethu.

⁵ Wën ci kek rëër kaam thin-nyəot, go Pïter lëk Jethu, “Raan piöoc, apath buk rëër ë tën. Yok abi duël kadiäk looi, tök tënë yi, ku tök kek Mothith, ku töñ dët kek Elija.”

⁶ Kënë jiem yen kälä, ee rin kuc yen wët pɛth bi lueel, rin këpuəth cik tiñ ci ke nyöñ nhüim wël.

⁷ Go këcit rur piny paat abi ciën tē yekë tiñ, ku piñkë Nhialic ke jam ëlä, “Kënë ë Wëndiën nhiaar, piñkë wëtde.”

⁸ Nawën tiñkë piny kaam thiin awën, ke ye Jethu yen tiñkë yetök.

⁹ Tëwën dhuk kek piny gət nhom, go Jethu lëk ke, “Duökkë kək cək tiñ lëk raan dët yet aköl bi Manh Raan jət ran yic.”

10 Gokë wët Jethu gam, ku jalkë röt aa thiëec ëlä, “Yenjö wic Jethu bi lueel wën ye yen jam jön rot ë ran yic?”

11 Ku thiëckë Jethu, “Yenjö ye kəc piöoc löön ye lueel lön ye yen Elija yen bi kan bën tuen, ku emën aci lök bën yicök?”

12 Go bëer ëlä, “Ee yic, Elija akəŋ bën tuen, rin bi yen dhël bën guir. Ku yenjö gët ye aya, lön Manh Raan abi kəc Itharel jai, ku abik cəl arem apeï?”

13 Alëk we lön ci Elija bën thæer ku acik luəci tēden nhiarkë, cit tē ci ye gät thün thæer rienke.”

Jethu aci dhəŋ la guəp jəŋrac kony

(Mt 17:14-21; Lk 9:39-43)

14 Nawën dhukkë tēnë abiöth Jethu kək awën, ke yökkë ke ke ci kəc juëc apeï gööm, ku kəc piöoc löön ke teer wël ke ke.

15 Tëwën tiŋ kek Jethu, gokë puöth miët apeï ku lorkë ku muöthkë.

16 Nawën yëët Jethu tēnë atuöckce ke thiëec, “Yenjö tæerkë wek ke?”

17 Go raan tök thän awën yic wët dët tēem thün ku lueel, “Raan piöoc, ŷen aci manhdiën ca kan bëi tēnë kockun yi buöth, bën bëi tēnë yi, rin këc kek jəŋ tō yeguəp lëu bik cuəp wei. Yeen aci jəŋrac la yeguəp ku ye pən jam.

18 Të däm ë jəŋ kēnë ye, aye wiët piny ku yik thok ayök, ku reem yelec ku riny. ŷen aci kockun yi buöth thiëec bik jək cuəp wei, ku akëckë lëu.”

19 Go Jethu lëk ke, “Wek kəc cie lac gam, yakë tak ba rëer kek we yet nən, bäk jäl gam. Bëiikë dhəŋ kēnë tēnë ŷen.”

²⁰ Gokë bëëi tënë ye.

Kaam wën tîj jəŋrac Jethu, ke ləth dhök ku wit piny ku ləor ku yik thok ayök.

²¹ Go Jethu wun thiëc, “Ye nən dəm jəŋ kënë ye?” Go bëer, “Tëwäär ye yen meth.

²² Acı jəŋ kënë duër nök, aye wiet məec, ku le wiet wïir bï duër mou. Na lëu ke yï kony ɣo.”

²³ Go Jethu lək ye, “Yenö ye yïn ye lueel, lən na lëu! Ee yic, kəriëc ebën apuəl yic tënë raan cı gam.”

²⁴ Go wun meth dhiau, “Yen ala gam ku akoor, kony ɣa bï gamdië rot juak.”

²⁵ Nawën tîj Jethu kəc juëc ke bö tēthiäak kek ye, ke rël jəŋrac ku lueel, “Ee yïn jəŋ miŋ cie jam. Yïn ayök, bäär bei dhök guöp, ku duk ben dhuk yeguöp.”

²⁶ Go jəŋrac dhiau yeröl ku wit piny, ku ləth, ku bïi bei. Ku jəl dhök anaŋnaŋ piiny abi kəc kök aa lueel, ka cı thou.

²⁷ Go Jethu dəm cin ku kony bï rot jət. Go rot jət ku këc.

²⁸ Tëwën rëer Jethu kek kacken ye buəth ë röt, ke thiëckë, “Yenö këc ɣok ye lëu buk jəŋ kënë cuöp wei?”

²⁹ Go lək ke, “Jəŋ cıt kënë acäk lëu bäk cuöp wei. Ee rök ë rot yen ë ye alëu bï jak cıt kakkä cuöp wei.”

Jethu aci ben jam ë Thuənde

(Mt 17:22-23; Lk 9:43-45)

³⁰ Go Jethu kek kacken ye buəth jəl tēwën ke ke ret pan Galilia yic, ku cïi wic bï la raan ŋic ye.

³¹ Rin ë ninkä ë piöoc kacken ye buəth kë bï rot luŋi ye, “Manh Raan abi thən kəc bï ye nök, ku na aköl ye nïn diäk ka bï rot jət raŋ yic.”

32 Ku aa kəc wětde bën deet yic, ku riöckë bik thiëc.

Kəc Jethu buəəth aaci wět tɛɛr

(Mt 18:1-5; Lk 9:46-48)

33 Gokë yet Kapernaum. Nawën lek yet yöt, ke thiëc atuöccke, “Yenö kënë tɛɛrkë wën dhël yic?”

34 Gokë gup riöc ku bitkë, rin wën cieth kek, aake teer wět lən, yeŋa kamken yen dīt apɛi.

35 Go nyuc ku cəɔl atuöccke kathiäär ku rou ku lək ke, “Piɛŋkë, na ye raan wïc ye bī t̄əu tuen, ka dhil dhuk ciëen ku luui rin kəc ëbën.”

36 Ku dəm meth ku cəl akääc kenhüim ku t̄ɛəu yecin yekët ku lək ke,

37 “Raan manh koor cīt manh kënë lor ë rienkië, acä lor, ku raan ya lor, acie ɣen ye lor, ee Wä Acieŋ toc ya.”

38 Nawën aköl dēt ke lək Joon ye, “Raan piöoc, ɣok aaci mony dēt t̄iŋ keye jakrɛc cuəp wei kəc gup ë rienku ku acuk pëen rin acie raanda.”

39 Go Jethu lueel, “Duökkë ye pëen rin raan kəŋ looi rienkië, acii lëu bī rot guə wel ku lək ya kërɛc.

40 Rin raan cii ɣo man, ee raanda.

41 Wek alək yic, raan we muəəc p̄iu ë rin ye wek kəc Raan cī ləc ku dəc, abä ariəpde yök.”

Ba raan dēt thöc kërɛc yic

(Mt 18:6-9; Lk 17:1-2)

42 Na ye raan wəŋ menh tək kam ë m̄ithkă ku bā maan, ka ŋuëen tənë ë raan cīt kënë, diët cī ruök yeth aləl dīt tet, ku p̄ik wiir bī mou. [

9:34 Lk 22:24 9:35 Mt 20:26-27; 23:11; Mk 10:43-44; Lk 22:26

9:37 Mt 10:40; Lk 10:16; Jn 13:20 9:40 Mt 12:30; Lk 11:23 9:41

Mt 10:42

⁴³ tē cīi kāmnden ē thou thīn, ku mac acie thou akōlriēēc ēbēn.]

⁴⁴ Ku na ye ciēndu yī cəl aloi awuōc, ke tēem wei, aṇuēēn ba pīr pīr path kek ciēn tōk, kek tē bī yīn la cin karou ku cuet yī pan many cie thou akōlriēēc ēbēn. [

⁴⁵ tē cīi kāmnden ē thou thīn, ku mac acie thou akōlriēēc ēbēn.]

⁴⁶ Ku na ye cōōkdu yī yāth awuōc yic, ke tēem wei, rin aṇuēēn ba pīr pīr path ke yī ye ṇəl, kek tē bī yīn la cōk karou ku cuet yī pan mac.

⁴⁷ Ku na ye nyiēndu yī cəl aloi awuōc, ke ṇuēt bei. Aṇuēēn ba rot mat bāāny Nhialic yic kek nyien tōk, kek tē bī yīn la nyīn karou ku cuet yī pan mac.

⁴⁸ Ee tēēn arēem yekē yōk thīn acie thōk, ē rin many pan mac acie many ye yor.

⁴⁹ Raan ēbēn abī lōk ē mac cīmēn ye ajuēr lōk awai.

⁵⁰ Awai apath. Ku na thōōk kōu alēi ke ben dhuōk thīn kēdē? Rēēr kē kek awan määth kamkun ku lakkē dōōr kamkun.

10

Jethu apiōōc wēt liōōi (Mt 19:1-12; Lk 16:8)

¹ Go Jethu jāl tēwēn ku ler Judia ku teem wār Jordan. Go kōc juēc apēi bēn guēēr tēnē ye. Goke piōōc cīmēnden thēer.

² Go Parathī kōk bēn tēnē ye ku wīckē bīk deep wēt ku thiēckē, “Na pāl raan tiēṇde ke cīi path?”

³ Go Jethu bēēr, “Yēṇō cī Mothith lēk we wāthēer?”

4 Gokë lueel, “Acī Mothith puöl bī moc athör liözi göt, ku pël tik.”

5 Go Jethu dhuök ke, “Mothith acī löñ kënë gät we ë rin wärkuan dīt aake cie yith ye lac gam.

6 Ku wäär tuenj cek Nhialic kəc aaci cak moc ku tik.

7 ‘Ku rin ë wët kënë raan abī wun ku man nyäänj piny, ku le ker kek tieñde,

8 ku keek karou aabi ya many tök.’ Këya aacii ben ya rou aa tök.

9 Këya, na cī Nhialic ke puöl bī ya moc ku tik, ka cīn raan päl ηek kamken.”

10 Ku wën cī kek dhuk baai, ke thiëec kacken ye buöth ë wët kënë.

11 Go lëk ke, “Na ye raan liözi tieñde ku thiëek tiñ dët, ka cī kërac looi tënë tiñden tuenj.

12 Ku na ye tiñj päl muonyde ku le mony dët thiaak, ka cī akər looi.”

Jethu adoc mith

13 Kəc kök aake ye mith bëëi tënë Jethu bī ke bën döc, go kəc Jethu buöth ke läät.

14 Nawën la Jethu kë looi atuöcke tiñ, ke dak puöu ku lueel tënë ke, “Calkë mith aabö tënë ya, duökkë ke pën. Raan wïc ye bī la bääny Nhialic yic adhil gam cīmën ë mith thiikä.

15 Alëk we, raan wïc ye bī bääny Nhialic yök adhil wët Nhialic gam, cīmën ye manh koor wët kəc ke dhiëth ye gam.”

16 Ku cööl mith yelööm ku tëëu yecin kenhüim ku döc ke.

10:4 L.rou 24:1-4; Mt 5:31

10:6 Cäk 1:27; 5:2

10:8 Cäk 2:24

10:12 Mt 5:32; 1Kor 7:10-11

10:15 Mt 18:3

*Raan ajak**(Mt 19:16-30; Lk 18:18-30)*

17 Tëwën jiël Jethu geeu, ke raan riñ tənë ye ku gut yenhiaal piny ku lueel, “Raan piöoc path yenö ba looi ba pír akölríeëc ëbën yök?”

18 Go Jethu thiëëc, “Yenö yin ye lueel lon yen apath? Acin raan path, ee Nhialic ë rot yen apath.

19 Yin anic löön Nhialic, ‘Duk raan näk, duk tin raan dët kər, duk kuëëñ wët lueth, duk cuëër, thek wuur ke moor.’ ”

20 Go bëër, “Raan piöoc, löönkä aaya theek tëwäär koor yen agut cit ëmën.”

21 Go Jethu döt apɛi, ku nhieer ku lueel, “Ee tök yen akëc looi, loor yaac kækku wei ëbën ku gam wëü tənë kəc nən, yin abi jiek la yök pan Nhialic, ku bäär buoth ya.”

22 Wën pin yen wët kënë, ke meen ku jiël ke ci puöu dak, rin ë la käjuëc apɛi.

23 Go Jethu yenhom wël kacken ye buoath ku lëk ke, “Abi yic riël tənë ajiek bik la bääny Nhialic yic.”

24 Go kacken ye buoath gai ë wëlkä. Go Jethu ben ber yic tənë ke, “Miëthkië, yenö ril yen këya bi raan la bääny Nhialic yic!

25 Apuol yic bi thöröl bak with cök, tənë tē bi raan ajak la bääny Nhialic yic.”

26 Gokë not ke gai apɛi, ku thiëckë, “Na ye këya, ke yena bi la pan Nhialic?”

27 Go Jethu ke döt ku bëër, “Acii raan bi lëu ë rot, bi gam tē këc Nhialic ye kony, rin Nhialic ë këriëëc ëbën lëu, acin kë dhal ye.”

28 Go Pïter rot jət ku lueel, “Na ɣo, ɣok kɔc cï kakkua ebën nyään piny ku buoθku yi?”

29 Go Jethu bëër, “Ee yic, ku alëk we, kuat raan cï panden nyään wei kek paan ë man ku nyiërakën, ku wun ku man ku miëthke ku kacke ebën ë rienkië, ku rin wët Nhialic,

30 cïi käjuëc bi yök pan Nhialic. Abi bëëi juëc ku wämäthakën ku nyiërakën ku märke juëc, ku miθ ku dum, ku kuöc ciëëŋ bi ye kuöc ciëëŋ aabi yök aya arak buoθ. Käkkä aabi yök pinyhom ë tën, ku abi pïr akölrüëc ebën yök aköldä.

31 Ku kɔc juëc tö tuenë emën aabi döŋ ciëën, ku kɔc kök juëc tö ciëën aabi la tuenë.”

Jethu ajam ë Thuände kën yic diäk

(Mt 20:17-19; Lk 18:31-34)

32 Naɣon aköl dët Jethu kek kacken ye buoθ, ku kɔc kök aake kuany dhël yic, ke la Jeruthalem. Ku Jethu ë tö tuenë ku buoθ kacken ye buoθ ke cï nhïim mum. Ku kɔc awën biöθ, ke cï riöc. Go Jethu atuöcke kathiäär ku rou ben caal teden röt, ku lëk ke kë bi rot la looi tënë ye.

33 Ku lëk ke, “Emën, ɣok aala Jeruthalem të bi Manh Raan la döm ku ɣëth bäny Itharel nhïim, ku kɔc piöc ë lööŋ. Ku abik tëm thou, ku thönkë bënyŋaknhom Roma mac baai bi la nöc.

34 Ku abik läät ku buikë, ku ŋuutkë ku thatkë, ku näkkë, ku na ye nin kadiäk cök, ka bi pïr ku jət rot ran yic.”

Käk wïc Jemith ku Joon

(Mt 20:2-28)

³⁵ Naγon theëi ke Jemith ku Joon wëët Dhubedi bö tənë Jethu, ku luelkë tənë ye, “Raan piöoc, awicku ba γo luöi kë buk thiëec tənë yï.”

³⁶ Go Jethu ke thiëec, “Yeñö wiëckë ba looi tənë we?”

³⁷ Gokë dhuk ëlä, “Të nyuc yin thönydu nhom diεkdu yic nhial, ke yï cöl γo aa nyuc kek yï, raan tök ləη cuëc, ku raan dët ləη cam.”

³⁸ Go Jethu lëk ke, “Wek aa kuc kë thiëckë, γen abi baη apei ë ninkä ku γen abi nöκ. Lëukë bāk gum cimëndië?”

³⁹ Gokë bëër, “Alëuku.” Go Jethu lëk ke, “Na cökkë we nöκ ayic, ka lëukë bāk gum,

⁴⁰ ku acie γen la riel ba raan nyuc köηdiën cuëc ku köηdiën cam kuany, ee Nhialic yen abi ke yiëk kacken ci guiër ke.”

⁴¹ Nawën le atuuc kök kathiäär piη, ke riääk puöth tənë Jemith ku Joon.

⁴² Go Jethu ke cöl ëbën ku lueel, “Aηiεckë lön kəc ci gam bik aa bäny kəc cie kəc Itharel aala riel kəc nhüim, ku aciï path bāk ciët ke.

⁴³ Ku kënë aciï rot bi looi kamkun. Raan wïc ye bi ya raandit kamkun adhil rot dhuök piny bi ya luui rin kəc kök.

⁴⁴ Ku na ye raan wïc ye bi ya bëny kəc nhüim, ka dhil ya aluaη kəc ëbën.

⁴⁵ Cimën Manh Raan aya akëc bën bi kəc bën loony, aci bën bi kəc bën kony, ku gem wëike bi kəc juëc waar thou yic.”

*Jethu akony cöör bi daai
(Mt 20:29-34; Lk 18:35-43)*

46 Go Jethu kek kacken ye buoath, ku kac juec kək yet gen Jeriko. Kaam wən jiël kek geeu, ke mony cœr ë kac lim, cøl Timawuth ë rëer dhël you ke lim.

47 Nawën piñ lön cï Jethu raan pan Nadharet yëet, ke cöt röl dît, “Bëny Jethu yïn anääth apëi. Yïn ë wën Debit cï Nhialic tooc. Kony ya.”

48 Go kac kək rël ku yöökkë bï biët, go not kiu apëi, “Wën Debit kony ya.”

49 Go Jethu köc ku lueel, “Cöolkë.” Gokë cœl, “Jot rot, yïn aye bëny cœl.”

50 Go rot puur abä alanhden acuat lööny wei yeköu ku rinj tënë Jethu.

51 Go Jethu thiëc, “Yenö wïc ba looi tënë yï?” Go cœr lueel, “Bänydië, awiëc ba ben daai.”

52 Go Jethu lëk ye, “Lœr, gamdu acï cøl apuol.” Go daai nyin yic, ku buoath Jethu.

11

Jethu acï la Jeruthalem ke ciëm yai (Mt 21:1-11; Lk 19:28-40; Jn 12:12-19)

1 Nawën nïn kək cök ciëen, ke Jethu kek kacken ye buoath la Jeruthalem. Ku tëwën cï kek thiök kek Bethpeec ku Bethanï, tëthiääk kek gøn Olip, ke Jethu tooc kacken ye buoath karou tuen,

2 ku lëk ke, “Lak bëëi tō tuen yïic ku tē yeet wek, ke wek aabi akaja cïn raan cï kan cath ye yök ke mac. Luonykë ku bëëikë.

3 Na le raan thiëc we, ke luelkë, awïc Bänyda, ku abï dhuk ëmën thiin.”

4 Gokë la ku yökkë manh akaja ke mac yöt thok, dhël you. Tëwën lony kek ye,

⁵ go kɔc ke kääc tēthiök ke thiëc, “Yeŋö luöikë, lony wek manh akaja?”

⁶ Gokë lëk ke cīt tēwën cī Jethu ke than thīn. Go päl ke ku jiëlkä.

⁷ Gokë manh akaja ɣäth tēnë Jethu ku kumkë köu aläthken, ku nyuc Jethu yeköu.

⁸ Kɔc juëc aacä aläthken thieth dhël yic, ku kɔc kök aacä ayör tiim dhoŋ dum yiic, ku thiethkë ke dhël yic aya.

⁹ Go kɔc ke tö yenhom tuen, ku kɔc ke buõth Jethu, yai looi ku yekë wak ëlä,

“Lecku Nhialic! Bëny dɔc raan bö ë rienku,

¹⁰ Nhialic dɔc bääny wäda Debit bö! Lecku Nhialic!”

¹¹ Ku jəl la Jeruthalem ku bək luan̄ Nhialic ku ciεeth kériëc ëbën. Nawën cī piny guõ cuol, ke dhuk Bethanī kek atuöccke kathiäär ku rou.

Jethu acī tim wak bī riau

(Mt 21:18-19)

¹² Naɣon̄ nhiäk, tēwën jiël kek Bethanī, Jethu ë nək cək.

¹³ Nawën ke tiŋ tim cīt ŋaap ke cī nhom thiäŋ ayör, go la cəl bī yök ke cī luök. Nawën le yet ke yök ke ayör kepëc, rin tēden ye yen luök aŋoot.

¹⁴ Go Jethu lueel, “Acīn raan kəŋ miëthku bən cam lanayon̄.” Ku wët kënë ëcī kocken ye buõth piŋ.

Jethu acī la luan̄ Nhialic

(Mt 21:12-17; Lk 19:45-48; Jn 2:13-22)

¹⁵ Nawën lek yet Jeruthalem, ke Jethu la luan̄ Nhialic, ku cop kɔc kəŋ yaac ayeer kal luan̄ Nhialic

yic. Ku wel agen kəc war wëeu yiic, ku thöc kəc γəc wei ë kuər.

¹⁶ Ku cī kuat raan la kē muk päl bī ret luan Nhialic lööm.

¹⁷ Ku jəl kəc piöc, “Acī gət ëlä athör thær wël Nhialic yiic, ‘Luanđië acī looi bī ya tən ye kəc wuöt ëbën rök thīn, ku yeen acäk wel bī ya luan cuër.’ ”

¹⁸ Wët kënë acī kəc käk Nhialic ku kəc piöc lööŋ piŋ ku wickë dhël nək kek ye. Ku keek aake cī riöc Jethu rin cī kəc ëbën puöth miət piöcde yic.

¹⁹ Nawën la thëi bën, ke Jethu kek atuöccke jiël geeu.

Atuuc Jethu aaci tim wäär tiŋ ke cī riau

(Mt 21:20-22)

²⁰ Naγən nhiäk dëët, tēwën kueny kek dhël yic, ke ke tiŋ tim cīt ŋaap wäär cī Jethu wak ke cī riau.

²¹ Go Pīter kēwäär cī Jethu lueel tak ku lueel, “Raan piöc tiŋ tim wäär ca wak acī riau.”

²² Go Jethu bëër, “Gamkë Nhialic.

²³ Wek alək yic, na le raan yöök gən kënë, cuat rot wūr, ku cī diu ku gəm lən bī kē cī lueel rot looi, ka tiŋ rot.

²⁴ Kēya, alək we, kuat kē thiēc tē rök yīn, gam lən bī yīn ye yök, ku kē wic aba yök.

²⁵ Ku tē rök yīn, ke yī pël wët piny tēnē raan dët, rin bī Nhialic adumuömkku päl piny aya. [

²⁶ Na cīi wët ye päl piny tēnē kəc kək, ke Nhialic acīi awäcdu pël piny.”]

Bäny Itharel aa riel Jethu yöŋ yic

(Mt 21:23-27; Lk 20:1-8)

²⁷ Gokë ben dhuk Jeruthalem, ku tēwēn cieth Jethu kal luanḡ Nhialic yic, ke bānydīt kāk Nhialic ku kɔc piöoc ë löönḡ ku jəl aa kɔcdīt baai, bö tēnē ye.

²⁸ Ku thiëckë ëlä, “Ee yīn ye riel ḡö tō yīguōp ye yīn luui këlä? Ku yeḡa yīk yī ë riel kënē ba keek aa looi?”

²⁹ Go Jethu bëēr tēnē ke, “Wek aba thiëec wēt kënē aya, na bëēr kë, ke wek aba lëk raan cä yīek riel ye ḡen kākka looi.”

³⁰ Lëkkë ḡa, “Joon raan kɔc muɔɔc nhīim, yök riel yen kɔc gām lökwëi tēnē Nhialic, aye rielde ë rot?”

³¹ Gokë guëek yic kamken ku luelkë, “Na luelku, ‘Ke yök tēnē Nhialic,’ Ka thiëc, ‘Aye ḡö këc wek wētde gam?”

³² Ku na luelku, ‘Ke rielde ë rot,’ ke ḡok aa jöny keek rin cī raan ëbēn ye gam.”

³³ Gokë dhuök Jethu, “Akucku.”

Go Jethu lëk ke, “Na ye këya, ke wek aacä lëk riel ye ḡen kākka looi.”

12

Jethu aci jam ë waal bi rëec bāny nyuɔɔth

(Mt 21:33-46; Lk 20:9-19)

¹ Nawēn ke Jethu jam waal tēnē kɔc man ye ëlä, “Monytui ëcī dom looi ku cum yic tiim ë luək ku rək. Ku looi tēn ye mīth tim guōr thīn bik ya māu. Ku wec kāt piny. Ku jəl dom riōp yic kɔc kōk, ku le keny wun dēt.

² Nawēn le tē cī tiim luək thōöḡ, ke tooc aluɔnyde tēnē ke bik la gām abäkke.

³ Gokë alony dōm ku thatkë ku copkë ciëen yecin.

⁴ Go raan la dom alony dēt ben tooc, gokë yup nhom, ku banjë apɛi.

⁵ Go alony dēt ben tooc, gokë nök, ku jolkë aloony kök aa that ku näkkë aloony kök.

⁶ Ku ë manhde yen ëci jal döŋ bi ben tooc. Go jäl tooc ku lueel, ‘Aniɛc abik la theek,’

⁷ Go kɔc awën ci riöp dom yic lueel ë kamken, ‘Kënë ë manh raan la dom, bi kãŋ lök thɔn aköldä. Bäk näkku ku kãkkä aabi döŋ kek yɔ!’

⁸ Gokë dɔm ku näkkë ku cuɛtkë guäpde wei.”

⁹ Ku jɔl Jethu ke thiëc, “Yenjö bi raan la dom looi? Abi ben ku nök kɔc awën ci riöp dom yic. Ku riöp dom yic kɔc kök.

¹⁰ Këckë wët ci göt athör thɛɛr wël Nhialic yic këne kan kueen?

‘Mën wäär yen ci atëet kuec, yen aci bën a mën ril apɛi.

¹¹ Kënë ë ye luoi Bëny, ayeku tiŋ ke path ku dhëëŋ yonyin!’ ”

¹² Go bäny Itharel puöth dak ku wickë bik dɔm, rin acik ŋic lɔn jɛɛm Jethu ë rienken. Ku rin riöc kek kɔc juëc tö thïn, gokë puöl ku jiëlkë.

Jethu awic bi wëëŋ wët ajuër

(Mt 22:15-22; Lk 20:20-26)

¹³ Go kɔc ke man Jethu, Parathi kök, ku kɔc Antipäth Yërot tuɔc tënë ye bik la wëëŋ, bi wët rac lueel.

¹⁴ Ku bik ku luelkë tënë ye, “Raan piöc, anjicku yin ë jam yith. Yin acie diɛɛr kãk ye kɔc kök tak. Ku yin acie diëtten ye kuëc nhom. Ku yin ë kɔc piöc bik kãk wic Nhialic looi dhël la cök. Lëk yɔ na

ye täktäku, buk ajuër dhiel aa gam, yok kəc Itharel tənë Cithër Bënyaknhom, kua cuk bi gäm ye?”

15 Ku Jethu eci ruënyden njic, ku bëër, “Yenö wic wek ye bäk ya deep ë wët? Bëëikë ë wënh kënë ba tiñ.”

16 Gokë jal yiëk wëëth. Goke thiëëc, “Ye nhom na, ku ye rin na kakkä ci giæet wëëth kəu?” Gokë bëër, “Aa kək Cithër Bënyaknhom.”

17 Go Jethu lək ke, “Gämke Cithër Bënyaknhom kēde, ku gämke Nhialic kēde.”

Gokë puëth dak rin ci Jethu ruënyden njic.

Nhialic abi kəc ci thou cəl aa ben pİR
(Mt 22:23-33; Lk 20:27-40)

18 Nawën ke kəc kək akut Thaduthi. Akut cii ye ye gam lon bi Nhialic kəc ci thou ben cəl apİR, bə tənë Jethu ku thiëckë ëlä,

19 “Raan piöoc, Mothith aci löñ gət ëlä tənë yo, ‘Na thou wämënh ë raan, ku nyiëëñ tik piny ke cİN mİth, ke wämënh koor ala yöt tik bi mİth dhiëëth yön mënhe.’

20 Na thöönku lon tō mİth tik thİN kadhorou. Ku thiëk wën dīt ku thou ke cİN mİth.

21 Go wën buëth ye la yöt tik ku thou aya ke cİN mİth ci dhiëëth. Ku loi kënë rot aya tənë mënhe ye kek diäk.

22 Ku looi rot këya tənë wämäthakën kək, keek ëbën kadhorou acİN mİth cik nyään piny.

23 Ku lek tueñ ku thiëckë, tē le kəc ci thou röt jət aköldä, bi ya tiñ na rin ci yen rëër ke ke ëbën kadhorou?”

24 Go Jethu bëër, “Wek aa kɔc ril nhiim cïn kē njiekkē, rin cii wek wël cï gät athör thëer wël Nhialic yic ye gam. Ku acäk ye gam aya lön bï Nhialic kē ye lueel ka bï looi, lëu bï looi.

25 Rin tē le kɔc cï thou röt jət, aacii bï thiëek ku aacii bï thiaak, aabï rëer kecīt atuuc nhial.

26 Ku na ye rin wët bï kɔc cï thou röt jət, ke we kēc athör cï Mothith gät kueen rin bun dëp, tēwäär cï Nhialic jam tënë ye ëlä, ‘Υεν ë Nhialic Abaram, ku Ithäk ku Jakop.’

27 Kɔc cï thou ke njic Nhialic aa pïr alanden. Yeen ee Nhialic kɔc pïr, ku kɔc cï thou aya. Acäk wuöc!”

Löŋ ril lëu bï theek kam ë lööŋ

(Mt 22:34-40; Lk 10:25-28)

28 Raan piöoc lööŋ kɔc Itharel ë tō thïn tēwën teer Jethu wël kek Thaduthi. Na le tïŋ ke Jethu ye wëlken njieç bëër, go bën tënë ye ku thiëc, “Ye löŋ nen yen ril apeï kam lööŋ?”

29 Go Jethu bëër, löŋ ril akïn, “Piëŋkē kɔc Itharel, Bányda ë Nhialic ku ee tōk.

30 Nhiar Bëny, Nhialicdu pušu ëbën, ku wëiku ëbën, ku nhiamdu ëbën, ku riëldu ëbën.

31 Löŋ dët ril ye kek rou akïn, yïn adhil raan dët nhiaar cïmën nhieer yïn rot. Acïn löŋ dët ril apeï wär ë lööŋkã karou.”

32 Go raan piöoc ë lööŋ lueel tënë Jethu, “Ee yic raan piöoc cīt tē ca luël ye, acïn Nhialic dët, Nhialic ë tōk.

33 Ku raan adhil Nhialic nhiaar piände ëbën, ku nhiamde ëbën, ku rielde ëbën. Ku adhil raan dët

nhiaar cimën nhiεer yen rot. Lööᅅkä karou kek adhil ë theek, tēn tē bī Nhialic näk ᅅök ku dor ë yīik nhūim.”

³⁴ Wēn tīᅅ Jethu ye ke cī bēēr apath, go lēk ye, “Yin aci mec kek bāāny Nhialic.” Ku tēēn aciᅅn raan kam kōc man Jethu cie bēn thiēc.

*Jethu aci kōc piōōc lōn yen raan ë tooc Nhialic
(Mt 22:41-46; Lk 20:41-44)*

³⁵ Tēwēn piōōc Jethu luanᅅ Nhialic, ke lueel, “Aᅅiεkē lōn ye kōc piōōc ë löōᅅ kōc Itharel ye lueel lōn Raan cī lōc ku dōc, abī ya raan dhiēnh Debit?”

³⁶ Debit guōp ēcī Wēi Nhialic ᅅōōk bī lueel ēlä, ‘Aci Nhialic lueel tēnē Bānydiē, “Nyuc ë tēn kōᅅdiēn cuēc, yet tē bī ᅅēn kōc aterdu dhuōk ciēēn yīōk.” ’

³⁷ “Ye kēdē ye Raan cī lōc ku dōc manh Debit, ku yeen aye Debit cōl ‘Bānydiē?’ ”

*Jethu alēk kōc bīk rōt tiit kōc gēt löōᅅ Itharel
(Mt 23:1-36; Lk 20:45-47)*

Ku kōc juēc awēn cī wēt Jethu piᅅ aaci puōth miēt.

³⁸ Tēwēn piōōc yen ke ke lueel, “Tiεtkē rōt, ku duōkkē kōc piōōc löōᅅ kōc Itharel ye kiēt. Kōc cath kek alēthken dīt bār, rōt teem ᅅōn ᅅōc yīic bī ke aa muōōth athēk.

³⁹ Ayekē nhiaar bīk nyuc tuēᅅ thōc kōcdīt tēn amat, ku ᅅōn path akōl yai,

⁴⁰ ku keek aa kāk lēēr tuōōr nyīn, ku rōōkkē apēi bīk kōc wēᅅ lōn puōth kek. Kōckā, aabī tēm awuōcdīt tet apēi!”

*Ajuēr lēēr
(Lk 21:1-4)*

⁴¹ Tëwën cī Jethu nyuc tē ye wëëu juaar thīn luan Nhialic, ke dōt kōc juēc wëëu cuat kēnē ajuēr yic. Ku kōc juēc ajiεek aake cī wëëu juēc ya tāāu thīn.

⁴² Nawën ke lëēr anāṅ bō ku cuet wëëu reen lik thīn.

⁴³ Go Jethu lueel tēnē kōcken ye buōth ēlā, “Wek alēk yic, lëēr kēnē aci Nhialic kēden cī juaar nhiaar tēnē kōc kōk ēbēn.

⁴⁴ Rin keek aa cīk juaar wëëuken juēc yiic, ku yen anāṅē, aci kēnē bī yen pīr dhuəl thīn ēbēn.”

13

Luan Nhialic Jeruthalem abī thuōr piny

(Mt 24:1-2; Lk 21:5-6)

¹ Tëwën jiēl Jethu luan Nhialic, ke lueel raanden tōṅ ye buōth tēnē ye, “Raan piōōc, tīṅ, ye luanđit dhēēṅ ṅō kēnē!”

² Go Jethu bēēr, “Yōōdđit dhēṅ ye tīṅkā, aabī thuōr piny ēbēn, ka cīn alēl tōṅ bī kōōc alēl dēt nhom.”

Acī Jethu lēk atuōōcke lōn bī ke maan

(Mt 24:3-14; Lk 21:7-19)

³ Tëwën rēēr Jethu gōn Olip nhom, ke cī yenhom wēl luan ē Nhialic, ke thiēēc Pīter ku Jemith ku Joon ku Andria wēn rēēr kek ē rōt.

⁴ “Lēk ṅo, ye nēn bī kēnē rot looi? Ku yeṅō bī ye nyuōth lōn cī tēn bī kākā rōt looi thiōk?”

⁵ Go Jethu lēk ke, “Tiēērke nhīim ku duōkkē rōt cōl aduōṅ.

⁶ Kōc juēc aabī bēn ē riēnkiē, ku ye ṅek lueel, ‘Ke yen Raan cī lōc ku dōc,’ ku aabī kōc juēc duōṅ.

⁷ Tē tīṅ wek tōṅ ke loi rōt akōldā, bī dhiēēth ayī kōc wuōn tōk rōt nōk, ke duōkkē diēer, kākā adhil

röt looi. Ku kärɛc kək aabī röt looi aya, ku acie lən cī thök ɛ piny bən.

⁸ Rin kəc paan tək aabī kenhüim tušəm ku thərəkə, ku wušt aabī thər kamken. Ayiëkyiëk piny juëc aabī röt looi bëi juëc yiic. Ku cənđit apɛi abī tšu thin. Käkka kek aa kək tuen.”

⁹⁻¹⁰ Ku lək Jethu atušöcke, “Wët Nhialic abī kan lək kəc ɛ pinyhom ɛbən, ke thök ɛ piny kəc bən. Muškkə wenhüim bək pušt riel kärɛc bī we yök yiic. Wek aabī köc bāny nhüim ɛ rienkië bək ke lək Wët Pušt Yam.

¹¹ Ku tš dəm we ku yëth we luk yic, duškkə diɛɛr tš bī wek la jiem thin. Lak tuen ke we piöoc wëtdië pinyhom ɛbən rin acie wek jam, ee Wëi Nhialic.”

¹² Ku ben Jethu lueel, “Raan kek wämənh aabī röt aa gaany bīk röt cəl anak. Ku wärken mīth aabī mīthken luəm, ku mīth aabī kəc ke dhiëth ke luəm bī ke cəl aa näk aya.

¹³ Kəc ɛbən aabī we maan rienkië. Ku raan bī ye pušu deet agut tš bī yen thou, abī pīr akölrüëc ɛbən.”

Kërɛc bī rot looi tənə kəc Jeruthalem

(Mt 24:15-28; Lk 21:20-24)

¹⁴ Piɛŋkə alək we aya, “Ala aköl bī wek kërɛc apɛi tīŋ. (Raan kuən adhil wët kənə deet yic.) Na rëër Judia ku tīŋ ɛ kənə, ke yīn adhil riŋ gat nhüim roor ba la thiaan.

¹⁵⁻¹⁶ “Ku raan tš dom yic acii ben dhuk baai bā alanhde la lööm. Ku raan rëër ayeer, acii ben la yöt bī la guik kə nyiɛi.

17 Diäär liec ku diäär muk mïthkor aabi gum apeidit ye nïnkä.

18 Röökkë bi röt cïi loi wiir yic rut.

19 Koc aabi gum apeï ye nïnkä, gum këc kë kaŋ yök tēwäär cek Nhialic koc agut cit emen. Ku acii rot bi ben looi.

20 Na këc Bëny looi bi nïnkä cäl alik, ŋuöt acin raan ci pir. Ku rin koccken ci kuany, aci nin cäl alik.

21 “Wek alëk këne, ‘Na le raan yöök we tiëŋkë Raan ci loc ku doc kin,’ tädë ke lueel, ‘Tiëŋkë yen akan!’ Ke duökkë gam.

22 Rin koc juëc abi ben ku lueel ŋek, ee ŋen Raan ci loc ku doc, ku lueel raan det e ŋen raan käk Nhialic tiŋ, ku looi käril apeï koc göi. Ku märkë koc kök ci Nhialic kuany, tē lëu kek ye.

23 Tietkë röt, këriëc ebën alëk we emen bäk wen-hïim tiit käk bi ben!

*Aköl bi Manh Raan ben
(Mt 24:29-31; Lk 21:25-28)*

24 “Awiëc ku bäk ŋic aya, ye nïnkä, tē ci koc jal gum apeï, aköl abi kum nyin bi piny cuöl, ku pëi acii bi ruël.

25 Kuël aabi röt yäak ku löönykë.

26 Ku Manh Raan abi tiŋ ke bö pial yiic kek diik ku riëldit apeï.

27 Ku yeen abä atuuc nhial tooc bik koccken ci loc kuööt yiic pinynhom ebën.

28 “Ŋieckë e këne tim cit ŋaap, tē looi yen yöök ku looi yiith, ke kër aci thiök.

²⁹ Këya, tē tīŋ wek kakkä ke loi röt, ke ŋiæckë lön cī yen thiök apēi.

³⁰ Alëk we, wek aacī bī mää r tē cök kakkä röt looi.

³¹ Nhial ku piny aabī liu, ku wētdië acī bī kaŋ mää r.

Rëer yī cī rot guiir

(Mt 24:36-44)

³² “Acīn raan ŋic aköl bī kakkä röt looi. Na cök atuuc nhial, ayī Wēnde, ka cīk ŋic, ë Wä rot yen aŋic ye.

³³ Rëerkë we cī röt guiir rin wek akuc aköl bī kënë rot looi.

³⁴ Kënë, acīt kënë rot looi tēnē raan la keny, ku nyiëēŋ aluənyke baai, ŋek ke luəide. Ku lëk raan cī nyiääŋ baai thok bī rëer ke tit akölaköl.

³⁵ Këya, wek adhīl rëer we tit aya, rin acäk ŋic yen tē bī Bānydun bēn thīn, lön bī yen bēn thēei, ku lön bī yen bēn wëer ciel yic, ku lön yen dhiēn thən ajīth, ku lön yen nhiäknhiäk ë rial.

³⁶ Na guə bēn, ke we cā yök we nin.

³⁷ Kë ya lëk we, alëk kəc ebēn. Rëerkë we tit, ke we tīr nhīim!”

14

Amat nək Jethu

(Mt 26:1-5; Lk 22:1-2; Jn 11:45-53)

¹ Nīn karou Yan Ayum cīn yic luəu nhom tuen, kəcđit kək Nhialic ku kəc piöc lööŋ aake wīc tē bī kek Jethu dεep thīn, bīk dəm ke kuc ku näkkë.

² Ku luelkë, “Acuk däm aköl yai, yok aabi tiit bi kəc juəc kan jal, rin na dämku ku näkku, ke kəc ηoot yai yic, tēdē ke kəc juəc aa thār kek yo.”

Maria aci tē theek yen Jethu thīn nyuəəth
(Mt 26:6-13; Jn 12:1-8)

³ Ku tēwən rēer Jethu Bethanī pan raan atuet cəl Thaimon, tēwən mīth yen, ke tik bō kek tōny koor cī cuēc ē tiəm ril la yic miök n̄ir cəl naar, ye ɣəac wēəu juəc apēi. Ku kuem thok ku luun̄ miök Jethu n̄hom ēbēn.

⁴ Go kəc kək ke rēer thīn puəth dak ku jīemkē kamken. “Yeŋō tuuk yen miök n̄ir?”

⁵ Miök n̄ir kēnē ηuət aci ɣaac wēəu juəc wār wēəu ye däm raan ē ruəən tək, ku yik wēəu kəc ηəŋ.” Ku nyienykē tik apēi.

⁶ Go Jethu lueel, “Pälkē, yeŋō nyieeny wek ye? Acī kēpath looi tēnē ɣa.

⁷ Rin kəc ηəŋ aabi rēer kek we akölaköl. Ku na wičkē bāk ke kony ka luəikē. Ku ɣen aciī bi rēer kek we akölaköl.

⁸ Tiŋ kēnē, aci kē lēu bi looi tēnē ɣa looi. Acī bēn bā bēn təc bi guäpdie guiir bi jal thiök.

⁹ Wek alək yic, kuaat tē bi Wēt Puəth Yam piəöc thīn pinynhom, kē cī tiŋ kēnē looi, abi ya lueel bi ye a tak.”

Judath aci Jethu ɣaac
(Mt 26:14-16; Lk 22:3-6)

¹⁰ Nawən ke Judath, raan tōŋ atuuc kathiäär ku rou, la tēnē kəcđit kāk Nhialic bi Jethu la luəm tēnē ke.

11 Gokë puøth miæt apæi wën piŋ kek wëtde, ku thønkë løn bï kek ye gãm wëëu juëc. Ku jøl tē bï yen Jethu døm thïn wïc.

*Jethu acï miëth yai cam kek atuöocke
(Mt 26:17-25; Lk 22:7-14, 21-23; Jn 13:21-30)*

12 Nawën aköl tuen Yandit Ayum cïn yic luou, næk amël rin yai, ke Jethu thiëëc kacken ye buøth ëlä, “Ye tēnen wïc yïn yo buk miëth yai la guuir thïn?”

13 Go Jethu kacken ye buøth tooc karou ku læk ke, “Lak geeu Jeruthalem, ku wek abï røm kek raan yëëc tööny pïu, biaathkë,

14 pan le yen thïn, ku lëkkë raan la baai. Aye Raan piöoc lueel, ‘Ye yøn nen bï yen miëth yai cam thïn yok kockiën ya buøth?’

15 Ku abï we nyuøth yøn nhial lääu yic cï guuir yic. Guiërkë miëthda ë tēën.”

16 Go koc ye buøth jäl ku lek geeu Jeruthalem, ku yökkë këriëëc ëbën cit tēwën cï Jethu ye læk ke thïn. Ku jølkë miëth yai guuir.

17 Nawën la thëi bën, ke Jethu bö kek atuöocke thiäär ku rou.

18 Tēwën mïth kek, ke lueel Jethu, “Wek alæk yic, raan tök kamkun abä luom ku ë raan mïth kek ya.”

19 Gokë puøth riääk ku jølkë gäi ku thiëckë tök-tök, “Makei! Ye yic? Ye yen?” Ku riëëkkë puøth apæi.

20 Go Jethu bëër, “Ee raan tök kamkun wathiäär ku rou, raan yecin ræk adušk yic kek ya.

21 Ee yic, Manh Raan abï nök cit tē cï gät ye rienke athör thëer wël Nhialic yiic. Ku raan bï ye luom abï gum apæi. Ku anuëën tēnë ye diët këc cak dhiëëth.”

Guirku röt apath buk guöp Bëny rəm
(Mt 26:26-30; Lk 22:14-20; 1Kor 11:23-25)

²² Tëwën mīth kek, ke Jethu lōm ayup ku dɔɔc, ku bēny yic ku gēm ke ku lueel, “Lōmkē kēnē, ku camkē, kēnē ee guäpdie.”

²³ Ku lööm aduŋ cī thiāŋ muōn abiēc, ku leec Nhialic ku gēm ke, ku dēkkē thīn ebēn,

²⁴ ku lueel tēnē ke, “Kēnē ē riēm diē, riēm ē dōör kek Nhialic, bī kuēr rin kɔc ebēn.

²⁵ Alēk we, ɣen aciī bī bēn dek muōn abiēc pinyn-hom tēn kek we, yet aköl bī ɣok ye dek ɣodhie pan Nhialic.”

²⁶ Nawēn cik jal thök ke ket waak, ku lek gɔn Olip cök.

Jethu aci kē bī Pīter ye jai lueel
(Mt 26:51-35; Lk 22:31-34; Jn 13:36-38)

²⁷ Ku lueel Jethu tēnē ke, “Wek kackiē, wek aabi kat ɣa cimēn kēwäär cī gōt athör thēer wēl Nhialic yic ēlä, ‘ɣen abä abiöök cɔl anak ku amēl abi wēer.’

²⁸ Ku tē cī ɣen jɔt raŋ yic, ke ɣen abi kaŋ la Galilia ba we la tiit thīn.”

²⁹ Go Pīter lueel tēnē ye, “ɣen aciī bī kat tē cɔk kɔc ebēn kat!”

³⁰ Go Jethu lueel tēnē ye, “Alēk yī, ē wēēr kēnē, ke thɔn ajīth kēc kiu rou, yīn abä jai arak diäk.”

³¹ Go Pīter dhuök ye, “Na cɔk ɣa nök kek yī, ke yīn acä bī kaŋ jai.” Ku lueel atuuc kök ebēn kēya.

Jethu aröök ke ɳic lɔn bī ye nök
(Mt 26:36-46; Lk 22:39-46)

32 Nawën ke Jethu kek kacken ye buoath la të ye cöl Jethemani, ku lueel tènë ke, “Nyuöockë tèn ku yiënkë, γεν ala röök.”

33 Ku cöl Pīter ku Jemith ku Joon bīk la kek ye. Ku jöl rëer ke nēk atiëël, ku dhiεeu apeī yepušu.

34 Ku lueel tènë ke, “Υεν adhiau pušu apeī, ee thou guöp. Rëerkë tèn ku yiënkë.”

35 Ku le tuenj tēthin-nyoat, ku rëëny rot piny ku röök ëlä, “Na lëu rot, ke kërεεc tit γa acii bö.”

36 Ku lueel, “Wä, yīn ë kəriëëc ëbën lëu, nyaai ë kërεεc kënë tènë γa. Ku acie wēt piändië ë wēt piändu.”

37 Nawën ke dhuk tènë ke ku yökke ke nin.

Go lueel tènë Pīter, “Thaimon, niënkë? Cäk yiën tēthin-nyoat?”

38 Ku lueel tènë ke, “Yiënkë ku röökkë bī we cii them jakrεc. Pušu ë gam ku guöp acin riël.”

39 Ku ben jäl ku le röök cīmën awën.

40 Go ben dhuk tènë ke, ku ben ke yök ke nin, rin cī nin ke göök apeī. Ku muumkë nhüim kë bīk lëk ye, rin cī kek gup riöc.

41 Nawën dhuk tènë ke kën ye kek diäk, ke thiëëc ke, “Not we nin! Lääñkë? Njεckë lön cī tèn nin thök, tiëñkë Manh Raan acī luöm kōc rεc. Ëmën, të bī ye jäl thön kōc rεc acī γëët.

42 Raan cä luəm acī bën. Jatkë röt, lokku buk röm.”

Jethu acī dām

(Mt 26:47-56; Lk 22:47-53; Jn 18:3-12)

43 Tëwën ηot jiεem yen, ke Judath raan ye kek thiäär ku rou bö ke cath kek kōc juëc muk paal ku

atuel, ke cī kəcdīt kāk Nhialic, ku kəc gāt lööŋ, ku kəcdīt baai tooc.

⁴⁴ Ku Judath ecī kəc awən cath kek ye, lək tē bī kek raan wickē bik bən dəm njec thīn, ɛlä, “Raan ba muöth ku ciεem yen ɛ raan wiεckē, damkē ku kuathkē ku tiεtkē röt ɛ kacke apath.”

⁴⁵ Kaam wən yēēt Judath, ke la tənē Jethu nyin yic ku lueel, “Bēny.” Ku muöth ke ciim.

⁴⁶ Gokē dəm ku derkē.

⁴⁷ Go raan tök kam kəc ye buəoth wən kääc thīn palde miēēt bei ku tök alony lui pan raandīt kāk Nhialic yic abī tεem wei

⁴⁸ Go Jethu ke thiēc, “Cäk bən we muk atuel ku paal bāk ya bən dəm. Cäk tak lən ye yen raan kəc rum?”

⁴⁹ Yen ɛ rēer ke we akölaköl ya piöc luanj Nhialic, ku wek aa kēc ya dəm. Ku kənē aci rot looi ɛ rin bī kē cī gāt athör thεer wël Nhialic yiic yenhom tiεεŋ.”

⁵⁰ Ku jəl kəcken ye buəoth nyääŋ piny ku ketkē.

⁵¹ Ku riēnythii dēt ceŋ alanh acuat ɛ buəoth Jethu. Nawən wic kəc awən kuath Jethu bik dəm,

⁵² ke nyiēŋ alath kecin ku ket kecin kē ceŋ.

Jethu aci yäth luŋ bāny Itharel yic

(Mt 26:5-68; Lk 22:54-55, 63-71; Jn 18:13-14, 19-24)

⁵³ Ku jolkē Jethu yäth pan Kaipa luk yic, cī bāny kāk Nhialic ku kəc piöc lööŋ, ku kəcdīt baai ken-hiim mat thīn.

⁵⁴ Ku Piter ɛ biöth ke mec kəc cök ciēen agut tē yeet yen luk yic. Ku nyuuc bī yoc aya tēwən yoc kəc bāny tiit thīn.

⁵⁵ Bänŷ kāk Nhialic aake cĭ nyuc bĭk Jethu wĭc gušp awušc cĭ looi, rin bĭ kek ye tēm thou, ku acĭn awušc cĭk yök.

⁵⁶ Kɔc juēc aake cĭ Jethu luəm ē lueth ku wēlken akēc rōm.

⁵⁷ Nawēn ke kɔc kɔk jɔt röt, ku lueelkē luenh kēnē Jethu gušp.

⁵⁸ Acuk piŋ ke lueel, “Ÿen abĭ luanŋ Nhialic cĭ raan looi kēnē thušr piny, ku na ye aköl ye nin diäk, ke ŷen abĭ dēt buth nyēnde, ke cie kēnē ē looi raan.”

⁵⁹ Agut ke aya aa kēc wēlken rōm.

⁶⁰ Go Kaipa rot jɔt kenhĭim ku thiēc Jethu, “Cĭn kē dhuk nhom wēl cĭ luēel yĭgušpkä yiic?”

⁶¹ Go Jethu biēt ku cĭi jam. Go Kaipa bēn thiēc, “Ye yök yĭpušu ye yĭn Raan cĭ lɔc ku dɔc, Manh Nhialic yeku door?”

⁶² Go Jethu bēēr, “Ee ŷen, ku wek aabĭ Manh Raan tĭŋ ke cĭ nyuc cuēny Nhialic ŋic kăŋ looi ēbēn, ku bĭi ke pial nhial.”

⁶³ Go Kaipa alāthke rēt yiic yeköu ku lueel, “Yeŋö ŋot wĭcku kɔc kɔk bĭ bēn jam kāk cĭ looi.

⁶⁴ Wek acĭ tē tōn yen Nhialic thĭn piŋ. Yeŋö yen wēt dun?” Gokē mat yic kedhie bĭ dhiel nök.

⁶⁵ Ku jɔl kɔc kɔk Jethu aa ŋušöt. Ku derkē nyin ku guutkē kecin ku yöökkē, “Mēek raan yĭ gut.” Ku dōm apuruuk ku biēkkē.

Pĭter ajsi Jethu

(Mt 26:69-75; Lk 22:56-62; Jn 18:15-18, 25-27)

⁶⁶⁻⁶⁷ Tēwēn rēer Pĭter piiny ke ŷöc mac, ke nyan lui pan Kaipa bö. Ku tēwēn tĭŋ yen Pĭter, ke döt

apɛi ku lueel, “Yiin aya, yin yi rëer kek Jethu raan Nadharet.”

⁶⁸ Go jai, ku lueel, “Yen aciï raandun ye lueel njic diɛn. Ku kë ye lueel acä cak deet yic aya.” Ku ler ayeer. Ku kaam thiin awën, ke thɔn ajith kiu.

⁶⁹ Go nyan awën tiŋ ku ben lëk kɔc kääc thïn, “Mony kënë ë raanden.”

⁷⁰ Go Piter ben jai. Ku kaam awën, ke lueel kɔc ke kääc thïn tënë Piter, “Ee yic, yin ë raanden, rin yin ee raan Galilia.”

⁷¹ Go Piter rot kuëñ, “Nhialic abä nök tē cii yen yic luel. Yen akuc raan jiem wek ë rienke.”

⁷² Nyin yic, tēwën ye dhiën ajith yic rou bëëk piny, ke Piter tak këwäär cï Jethu lëk ye, “Tuenj ke thɔn ajith këc kiu kënë ye kek rou, ke yin abä jai arak diäk.” Ku wel yenhom wei kɔc yiic ke cï guöp yär ku dhiëu.

15

Kɔc Itharel aaci Jethu gaany tënë Pilato (Mt 27:1-2, 11-14; Lk 23:1-5; Jn 18:28-38)

¹ Nayɔn nhiäk rial yic, ke kɔcdit kāk Nhialic, ku kɔcdit baai ku kɔc piöoc lööŋ mët tē bik luši Jethu. Gokë rek ku kuεthkë tënë bëny Pilato.

²⁻³ Kɔc luk aake cï Jethu gaany lɔn cï yen käreɔc apɛi looi. Go Pilato thiëc, “Ye yin bënyɔnakhom kɔc Itharel?” Go Jethu bëër, “Ee yen, cit tē ca luël ye.”

⁴ Go Pilato ben thiëc, “Cii kajuëc cï yi gaanykä ye bëër, pinj kakkith yeke kuεen yiguöp.”

⁵ Go Jethu biët ku cii wët Pilato bëër. Go Pilato gäi.

Jethu aci tēm thou

(Mt 27:15-26; Lk 23:13-25; Jn 18:39-19:16)

⁶ Rušön ebën, aköl Yan Ayum cïn yic luou, bēnyṅaknhom ē raan tōk kam kəc cī mac lony, tē wïc kəc baai ye bī lony.

⁷ Ke mony cəl Barabath ē mac, kek kəc cī kəc nök ke thär kek kəc mac baai.

⁸ Go kəc juēc apēi la tēnē Pilato, ku thiëckē bī ke luši kē ye looi aköl yai.

⁹ Go Pilato ke thiëc, “Wiëckē ba Jethu bēnyṅaknhom Itharel, lony tēnē we?”

¹⁰ Ee ṅic lön yen tiεl ku män μεεν kəc luk Jethu, yen aabi kek Jethu tēnē ye.

¹¹ Ku kəc ater Jethu aake ye kəc kušöt thook, bik lëk Pilato bī ya Barabath yen lony.

¹² Go Pilato ke thiëc, “Yenö ba looi tēnē raan yakē cəl ke bēnyṅaknhom kəc Itharel?”

¹³ Gokē rek yic röldit, “Apiëët tim cī riūu kōu.”

¹⁴ Go Pilato ke βen thiëc, “Yenö? Ye awäc ṅö cī looi?” Gokē βen rek yic röldit apēi, “Apiëët tim cī riūu kōu.”

¹⁵ Go Pilato Barabath lony rin wïc yen kəc bik puöth miεt. Ku wën cī yen apuruuk yōök bik that ku ṅakkē nhom ē kuöth, ke gēm ke bik la piäät tim cī riūu kōu.

Apuruuk aaci Jethu bui

(Mt 27:27-31; Jn 19:2-3)

¹⁶ Go apuruuk Jethu kuaath ayeer pan bēny. Ku cəl kē apuruukken kōk bik röt mät ke.

¹⁷ Ku rukkē alanh mathiän Jethu kōu. Ku jolkē kēr la kuöth riic yiic ku ṅek kek yenhom.

18 Ku jolkë aa cəɔl, ku muöthkë ku buikë, “Mädho bənyŋaknhom Itharel.”

19 Ku yuupkë nhom wai, ku ŋuutkë guöp, ku gutkë kenhiəl piny bik nyuəəth ciət leckë.

20 Wən cī kek ye jal bui, ke ke bīi alanh mathiän awən bei, ku dhukkë aläthke yeköu, ku kuathkë bik la piäät tim cī rīiu köu.

Jethu acī piäät tim cī rīiu köu

(Mt 27:32-44; Lk 23:26-43; Jn 19:17-27)

21 Təwən cī tim cī rīiu Jethu göök kətkət, ke mony cəl Thaimon, raan pan Thirene, wun Alekdhändər ku Ruputh, ë bə baai ke kuany dhəl yic ke la geeu. Go apuruuk dəm riel bī tim cī rīiu ket.

22 Ku yeetkë tē cəl Golgotha, ku wətde yic, gən la ŋeŋ-ŋeŋ cīt apen nhom raan.

23 Ku gəmkë Jethu muön abiəc cī liäap wäl kec cəl mir bī dek, go kuc ye.

24 Gokë jäl piäät tim cī rīiu köu. Ku cuətke gək bik aləth Jethu tek kamken.

25 Ee ye tē cīt lunyluny yök yen ë piəət kek ye tim cī rīiu köu.

26 Ku jolkë awuəc yekë tak ke cī Jethu looi, gət nhial tim cī rīiu köu ëlä, “BƏNYŊAKNHOM ITHAREL.”

27-28 Ku piəətkë cuər karou kek Jethu tiim cī rīiu kööth aya, raan tök ləŋ cuəc ku raan tök ləŋ cam.*

29 Ku jəl kəc ke ye tēək təwən Jethu aa cuiit ku latkë ku luelkë, “Cie yīn wäär ye lueel lən bī yīn luan Nhialic thuör piny ku buth nīn kadiäk.

15:21 Rom 16:13 15:24 Wk 22:18 * 15:27-28 Athör kök theər wəl Nhialic aa 15:28 mat thīn ëlä, “Yeen acī nök cimən kəc käre c looi.” Acī yenhom tiəŋ. 15:29 Wk 22:7; 109:25; Mk 14:58; Jn 2:19

³⁰ Na ye këya, yejö cii yin rot kony ku bär piny tim cï riiu köu!”

³¹ Këya, ee ye kacken ater bui ku luelkë kamken. “Ee kəc kək kony ku cii rot kony.

³² Raan cï ləc ku dəc cï Nhialic nhiaar ku yik riël, cï rot looi bi ya bányda, jəl bən piny tim cï riiu köu emən, buk jəl tiŋ ku gamku!” Ku acï kəc awən cï piäät tiim kööth cimənde aa bui ku lëetkë aya.

Jethu acï thou ayic

(Mt 27:45-56; Lk 23:44-49; Jn 19:28-30)

³³ Nawən akəl ciël yic ke muöth loi rot yet tään aköl pan awən,

³⁴ Nawən tään akəl, ke Jethu cöt röl dit, “*Eloi, Eloi, lama thabakthani?*” Ku wëtde yic, “Nhialicdië, Nhialicdië, yejö pël yin ya wei?”

³⁵ Nawən piŋ kəc kək ke kääc thïn, ke luelkë, “Pieŋkë acəl Elija.”

³⁶ Go raan tők kat ku lut alath muön wac yic. Ku tēëu wai thok ku ɣək Jethu thok, ku lueel, “Titku buk tiŋ lən bi Elija bən bi bən bëëi bei tim cï riiu köu!”

³⁷ Ku jəl Jethu keŋ apɛi, ku thou.

³⁸ Ku kaam wən ka alanh ye gëëŋ, bi luəŋ Nhialic tek yic aləŋthïn rɛst yic ë rou, jək nhial yeet piny.

³⁹ Go bəny apuruuk tō thïn lueel wən tiŋ yen tē cï Jethu thou thïn, “Mony kënë ë ye Manh Nhialic alanden!”

⁴⁰⁻⁴¹ Diäär aake tō thïn, ku keek aake daai tēmec. Wäär rëer Jethu Galilia, ee ye diäärkä buöth bik miëth aa looi tənë ye. Ku diäär juëc kək ke cath kek ye, wäär le yen Jeruthalem aake tō thïn aya. Kam ë

diäärkä Maria Magdalena, ku Thalome, ku Maria man Jemith thii kek Jothep aake tō thīn.

Jethu aci thiök

(Mt 27:57-61; Lk 23:50-56; Jn 19:38-42)

⁴²⁻⁴³ Wēn col piny, bī aköl cīi kōc Itharel ye luui guō bēn, ke Jothep raan gen Arimatheo bō. Ku ē ye raan kōcdit luŋ Itharel, ku yeen aya ēcī Wēt Puōth Yam gam. Nawēn le tīŋ lōn cī Jethu thou, ke riil yenyin ku ler tēnē Pilato, ku thiēēc guōp Jethu bī la thiök.

⁴⁴ Go Pilato gai lōn nadē ke Jethu cī guō thou. Ku cōl bēny apuruuk ku thiēēc lōn cī Jethu guō thou ayic.

⁴⁵ Nawēn piŋ tēnē bēny apuruuk lōn cī Jethu thou, go guāpde puōl bī Jothep nyaai.

⁴⁶ Go Jothep kōc tooc bik alanh yer la γοοc, ku bīi guōp Jethu piny tim kōu, ku der alanh awēn. Ku tēēu raŋ cī wec kuur yic. Ku lōr alēl dīttet raŋ thok.

⁴⁷ Maria Magdalena ku Maria man Jothep aake daai, ku tīŋkē tē cī ye thiök thīn.

16

Jethu aci rot jōt raŋ yic

(Mt 28:1-8; Lk 24:1-12; Jn 20:1-10)

¹ Naγōn thēēi aköl cīi kōc Itharel ye luui, ke Maria Magdalena ku Thalome ku Maria man Jemith la miök nīr γοοc bī kek guōp Jethu la tōc.

² Naγōn nhiäk rial, aköl Nhialic, abō aköl nyin ke la raŋ nhom.

³ Wēn nōot kek dhēl yic, aake rōt thiēēc, “Yeŋa ba alēdīt tō raŋ thok la laar wei?”

⁴ Nawën jøtkë kenyin ke tijn alal ke ci laar wei.

⁵ Gokë la ran yic, ku tijnkë riénythii ë kõn cuëc ke rëër ke ceñ alanh yer. Gokë gäi apëi.

⁶ Go lueel, “Duökkë gëi, anjic wek awic Jethu raan gen Nadharet wäär ci piäät tim ci rüu ksu. Aliu ë tën, aci rot jøt. Tiënkë tëwäär ci kek ye tääu thïn.

⁷ Lakkë ku lëkkë kacken ye buoath ku Piter, lön yen Jethu aci la Galilia. Abäk la yök thïn cimën wäär ci yen ye lëk we.”

⁸ Gokë la ayeer ran yic ku ketkë, ke leth, ke ci gäi. Acin raan cik lëk wët kënë dhël yic, rin ci kek riöc.[

*Jethu aci rot nyüsth Maria Magdalena
(Mt 28:9-10; Jn 20:11-18)*

⁹ Wën ci Jethu rot jøt ë ran yic çon nhiäk rial aköl Nhialic, ke kõn rot nyüsth Maria Magdalena wäär ci yen jakreëc kadhorou cuop wei yeguop.

¹⁰ Go la ku lëk atuuc Jethu ke rëër thuöu yic ke dhiau, lön ci Jethu rot jøt.

¹¹ Nawën pinjë tënë ye lön ci Jethu ben pir, ku aci tijn, gokë cii gam.

*Jethu aci rot nyüsth kacken ye buoath karou
(Lk 24:13-35)*

¹² Nawën ke Jethu nyuth rot atuöcke karou ke ci rot waan, tëwën kueny kek baai yic. Ku cik njic lön ye yen Jethu.

¹³ Gokë dhuk Jeruthalem nyin yic bik kacken la lëk, ku akëc kacken gam.

*Jethu aci rot nyüsth kacken ye buoath thiäär ku tök
(Mt 28:16-20; Lk 24:36-49; Jn 20:19-23)*

¹⁴ Nawën ke Jethu jøl rot nyuəəth tənë atušöcke kathiäär ku tök ke ke mïth. Ku nyieeny ke rin këc kek gam, ku rin cï kek nhïim riël bik wët kəc cï ye tïŋ ke cï pïr, cïi gam.

¹⁵ Nayən aköl dët ke lëk ke, “Lak pinynhom ku lëkkë kəc ëbën Wët Puəth Yam Nhialic.

¹⁶ Raan bi gam ku yök lökwëi, abi pïr akölrïëc ëbën, ku raan bi jai aciï bi kony.

¹⁷ Kəc cï gam abi yiëk riël kënë, aabi jakrɛc aa cuəp wei ë riɛnkiɛ, ku aabi jam thok kök.

¹⁸ Aabi kecin aa tääu kəc tuany nhïim, ku aabi pial. Na cəkkë käpieny kuany, ku dekkë kək ë kəc luaaŋ, kacïn kë näk ke thïn.”

Jethu aci yäth pan Nhialic

(Lk 24:50-53; Lk 1:9-11)

¹⁹ Nawën cï Jethu nin nök ke ke, ke yëth pan Nhialic ku nyuuc köŋ cuëc ë Nhialic.

²⁰ Ku jøl atuuc Jethu thiëi pinynhom ke ke lëk kəc. Ku jøl kəkken jəŋ göi yekë ke looi kenhïim aa tiɛɛŋ, rin tö riël ë Nhialic ke ke.]*

16:15 Luai 1:8 **16:19** 1:9-11 * **16:20** Athör theer juëc la cök ku kəc theer ŋic ke Marko 16:9-20 akëc mat thïn.

Lëk yam
New Testament in Dinka, Southwestern (SU:dik:Dinka,
Southwestern)

copyright © 2006 Wycliffe Bible Translators, Inc.

Language: Dinka, Southwestern

Translation by: Wycliffe Bible Translators, Inc.

Dinka, Southwestern

dik

Sudan

Copyright Information

© 2006, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Dinka, Southwestern

© 2006, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-22

PDF generated using Haiola and XeLaTeX on 18 Apr 2025 from source files dated 29 Jan 2022

d94b9d26-33ff-5c4e-819f-5bfe86ac9e55